

才望

兩浙名賢錄

二十

兩浙名賢錄卷三十九目次

才望

漢

江夏太守賀仲真純

吳郡太守盛孝章憲

子巨附

三國吳

沈子正友

典軍中郎將丁誦

晉

濟陰太守虞子文昂

廣州刺史孔德澤汪

中丞孔敬林羣

吳興太守虞思行斐

子谷附

吏部尚書謝弘道奉

黃門侍郎王子猷徽之附子

尚書左僕射謝叔源混

宋齊梁陳

侍中沈景緯冲兄淡深附

楊州別駕陸遜業閑子絳附

尚書左僕射陸士完繕

楊州中從事孔淹原廣孔道附

謝右丞岐弟嶠真附

隋

禮部侍郎許務本善心

唐

太子詹事陸餘慶子瑑附

給事中徐處仁岱

秘書監馮退思審子緘附

宋

工部侍郎錢就之昱

防禦使錢明叔晦弟暄附

天章閣待制沈典宗起

少宰劉德初正夫父載二子附

荆湖轉運判官劉先之牧

判南京國子監方闕弟閻聞附

安撫使盧行之知原

錄事參軍何茂恭恪父槩兄恢附

寶謨閣待制陸務觀游

平江守徐吉卿嘉

知鄂州莫子濛濛

吏部侍郎鄭汝諧

轉運判官葉實之 朝請郎王道甫 自中

知閩縣胡巖起 父臬子 居仁附 直秘閣趙蹈中 汝讜

中書舍人陳介翁 力修 進士孫吉甫 枝 父允子 起子附

兵部尚書洪伯魯 勲

元

治中陳剛中 孚 弟之 純附 胡仍仲之 綱

明一

刑部主事葉夷仲 見泰 弟附 刑部郎中詹國器 鼎

大理寺評事顧觀 禮部右侍郎蔣良夫 驥

禮部尚書李至剛 銅 南國子祭酒陳光世 敬宗

刑科給事中陸中善 子珪附 尚寶司少卿朱永年 祚

辰州知府何彥容 瀕 翰林庶吉士柴廣敬 欽

少詹鄒汝舟 濟 太僕寺少卿沈升

監察御史陳廷章 憲 陝西左叅政李孟博 約

山東叅議張子良 刑部郎中鄭良載 厚

兵部尚書徐良玉 琦 僉都御史陳廷詢 詔

南太常少卿夏韞 輝瑄 僉都御史陸仲輿 矩

大理寺卿湯正 傳宗 刑部右侍郎葉景 暘春

左副都御史邵以先玘 監察御史陸子達和

工部尚書王原之來附子鑰 禮部尚書王一寧

巡撫都御史陳德清漁 應天府尹彭中孚信

左春坊周中規旋 兵部郎中洪子常經

少詹事司馬恂如恂 湖廣叅政倪良弼輔

禮部右侍郎汪伯諧附子 工部尚書胡共之拱辰

副都御史陳宗之鎬附弟欽

兩浙名賢錄卷之三十九目次終

兩浙名賢錄卷之三十九

東海徐象梅仲和氏纂

平原沈延銓秀納氏閱

才望

漢共三人

江夏太守賀仲真純

賀純字仲真山陰人少為諸生博極羣藝三舉賢良皆

不就復徵議郎數陳災害上便宜數十事多見省納官

終江夏太守

吳郡太守盛孝章憲

子巨附

盛憲字孝章，會稽人。舉孝廉，補尚書郎，稍遷吳郡太守。以疾去官，居餘姚。孫策平定吳會，誅其英豪，不附已者，憲素有盛名，策深忌之。少府孔融憂其不免，致書曹操，稱孝章丈夫之雄，天下談士依以揚聲，宜有以引拔之。操徵爲騎都尉，制命未至，果爲孫策所害。子巨奔魏，官至征東司馬。

三國吳 共三人

沈子正友

沈友字子正，會稽吳人。年十一，華歆行風俗，見而異之，因呼曰：「沈郎，可登車語。」友逡巡却曰：「君子講好會，宴以禮，今仁義陵遲，聖教漸壞，先生銜命將以禪補先王之教，整齊風俗，而輕脫威儀，猶負薪救火，無乃更崇其熾乎？」歆曰：「自桓靈以來，雖多英彥，未有幼童若此者。」弱冠博學，多所貫綜，善屬文辭，兼好武事。注孫子兵法，又辯於口，每所至，衆人皆默然，莫與爲對。咸言其筆之妙，舌之妙，刀之妙，三者皆過絕於人。權以禮聘，旣至，論王霸之畧，當世之務，權改容敬焉。正色立朝，清議峻厲，爲

庸臣所譖，誣以謀反，權亦以終不為已用，故殺之。

典軍中郎將丁誦

丁誦，錢塘人。時方尚門閥，而誦地族寒微，與陽羨張秉、烏程吳粲、雲陽殷禮並有時名。顧劭拔而友之，為立聲譽，以並陸全之列。仕吳，至典軍中郎將。

晉 共九人

濟陰太守虞子文昂

虞昂，字子文，翻之第八子也。少有倜儻之志，仕吳黃門郎。以捷對見異，超拜尚書侍中。晉軍來伐，遣昂持節都

督武昌。以上諸軍事，及建鄴不守，先上還節，蓋印綬。然

後歸順。晉武嘉其有禮，授濟陰太守，抑強扶弱，甚著威

風。卒於官。

廣州刺史孔德澤汪

孔汪，字德澤，會稽內史愉之次子也。好學，有志行。孝武

帝時，位至侍中。時茹千秋以佞媚見幸於會稽王道子，

汪屢言之於帝，帝不納。遷尚書太常卿，以不合意求出。

為假節都督交廣二州諸軍事，征虜將軍，平越中郎將。

廣州刺史，甚有政績。為嶺表所稱。太元十七年卒。

中丞孔敬林羣

孔羣字敬林，餘不亭侯愉之從弟也。有智局志，尚不羈。蘓峻入石頭時，匡術有寵於峻，實從甚盛。羣與從兄愉同行於橫塘，遇之，愉止與語，而羣初不視術。術怒，欲刃之。愉下車抱術曰：「吾弟發狂，卿爲我宥之。」乃獲免。後峻平，王導保存術，嘗因衆坐，令術勸羣酒，以釋橫塘之憾。羣答曰：「羣非孔子，厄同匡人。雖陽和布氣，鷹化爲鳩，至於識者，猶憎其目。」導有媿色。歷仕中丞，性嗜酒，導嘗戒之曰：「卿恒飲，不見酒家覆甌布，日月久糜爛。」邪答曰：「公不見肉糟淹，更堪久邪？」嘗與親友書云：「今年田得七百石，秫不足了麩葉事，其沉湎如此。」卒於官。嗣子沉，傳在高隱。

吳興太守虞思行驥

子谷附

虞驥字思行，潭之兄子也。雖機幹不及於潭，然而素行過之。與譙國桓彝俱爲吏部郎，情好甚篤。彝遣溫拜驥。驥使子谷拜彝，歷吳興太守、金紫光祿大夫。王導常謂驥曰：「孔愉有公才而無公望，丁潭有公望而無公才，兼之者其在卿乎？」官未達而喪，時人惜之。子谷位至吳國。

內史

吏部尚書謝弘道奉

謝奉字弘道山陰人歷安南將軍廣州刺史吏部尚書

免官東還道遇謝安停三日共語安欲慰其失官奉輒

引以他語雖信宿竟不言及安深恨之謂同舟曰謝奉

故是奇士

黃門侍郎王子猷徽之

子楨之附

王徽之字子猷性卓犖不羈為大司馬桓溫參軍蓬首

散帶不綜府事又為車騎桓冲騎兵參軍冲嘗問卿署

何曹對似是馬曹又問管幾馬曰不知馬何由知數又

問馬比死多少曰未知生馬知死嘗寄居空宅中便令

種竹或問其故徽之但嘯咏指竹曰何可一日無此君

時居山陰夜雪初霽月色清朗四望浩然獨酌酒詠左

思招隱詩忽憶戴逵逵時在剡便夜乘小船詣之經宿

方至造門不前而反人問其故徽之曰本乘興而來興

盡而反何必見安道邪雅性放誕好聲色嘗夜與弟獻

之共讀高士傳讚獻之賞并丹高潔徽之曰未若長卿

慢世也其傲達若此後為黃門侍郎弃官東歸與獻之

俱病篤未幾獻之卒徽之奔喪不哭直上靈床坐取獻之棊彈之久而不調歎曰嗚呼子敬人棊俱亡因頓絕先有背疽遂潰裂月餘亦卒子楨之字公幹歷位侍中大司馬長史桓玄爲太尉朝臣畢集問楨之我何如君亡叔在坐咸爲氣咽楨之曰亡叔一時之標公是千載之英一坐皆悅

尚書左僕射謝叔源混

謝混字叔源會稽內史琰之子也少有美譽善屬文初孝武帝爲晉陵公主求婚謂王珣曰主婚但如劉真長

王子敬便足如王處仲桓元子誠可才小富貴便豫人家事珣對曰謝混雖不及真長不減子敬帝曰如此便足未幾帝崩袁崧欲以女妻之珣曰卿莫近禁鬻初元帝始鎮建鄴公始窘罄每得一狔以爲珍膳項上一鬻尤美輒以薦帝臣下未嘗敢食於時呼爲禁鬻故珣因以爲戲混竟尚主襲父爵桓玄嘗欲以謝安宅爲營混曰召伯之仁猶惠及甘棠文靖之德更不保五畝之宅邪玄聞慙而止歷中書令中領軍尚書左僕射領選以黨劉毅誅國除及宋受禪謝晦謂劉裕曰陛下應天受

命登壇日恨不得謝益壽奉璽紱裕亦歎曰吾甚恨之使後生不得見其風流益壽混小字也

宋齊梁陳 共十人

侍中沈景緯冲

兄淡深附

沈冲字景緯懷文之季子也仕宋歷撫軍正佐兼記室及懷文得罪被繫冲兄弟行謝情哀貌苦見者傷之柳元景欲救懷文言於孝武曰沈懷文三子塗炭不可見願陛下速正其罪帝曰宜急救之使其意分竟殺之元景爲之歎息冲兄弟以此知名累遷司徒錄事齊武在東宮待以舊恩及卽位轉御史中丞侍中遷五兵尚書冲與兄淡深名譽有優劣世號爲腰鼓兄弟淡深並歷御史中丞兄弟三人並爲司直晉宋所未有也武帝方欲任冲尋卒追贈太常謚曰恭子

揚州別駕陸遐業閑

子絳附

陸閑字遐業慧曉之兄子也有風槩與人交不苟少爲吳郡張緒所知仕至揚州別駕齊明帝崩閑謂所親曰車駕晏百司將聽冢宰主上地重才弱必不能振難將至矣乃感心疾不復與州事永元末刺史始安王遙光

據東府作亂，或勸去之。閼曰：吾為人吏，何可逃死？臺軍攻陷城，閼以綱佐被收，至杜姥宅。尚書令徐孝嗣啟，閼不與逆謀，未及報。徐世標命殺之，閼四子，厥絳完襄也。絳字魏卿，時隨閼抱頸求代死，不獲，遂以身蔽刃，行刑者俱害之。厥襄自有傳。

尚書左僕射陸士完縉

陸縉字士完，御史中丞任之子也。幼有志尚，以雅正知名。紹泰元年，除司徒右長史、御史中丞。以父任所終，固辭不拜。陳武帝受命，遷侍中，出為新安太守。文帝嗣位，徵為中庶子，領步兵校尉，掌東宮管記。縉儀表端麗，進退閒雅，趨步躡履，文帝使太子諸王咸取則焉。後拜御史中丞，猶以父所終，故固辭不許。乃權撰廨宇，徙以居之。歷官太子詹事、尚書左僕射、參掌選事。別勅與徐陵等七人參議政事，卒贈特進，謚曰安子。子數歲，詔引入殿內，進止有父風。宣帝因賜名慧，辯字敬仁。

揚州中從事孔淹原廣 孔道附

孔廣字淹原，會稽人。美容止，善吐論，以才學知名。一時王儉、張緒咸美之。儉常云：廣來使人廢簿，領叵不須來。

來則莫聽去。緒數巾車詣之。每歎云。孔廣使吾成輕薄。祭酒。其為名流。傾矚如此。仕至揚州中從事。時同邑孔。逭抗直有才藻。嘗製東都賦於時。才士稱會稽二孔云。

謝右丞岐 弟嶠附

謝岐。會稽山陰人也。父達。梁太學博士。岐少機警好學。仕梁為山陰令。侯景亂。流寓東陽。景平。依於張彪。彪在吳郡及會稽。庶事委之。彪每征討。恒留岐監郡。知後事。彪敗。陳武帝引叅機密。為兼尚書右丞。時軍旅屢興。糧儲多缺。岐所在幹事。深被知遇。永定元年。為給事黃門侍郎。中書舍人。兼右丞如故。天嘉二年卒。贈通直散騎常侍。弟嶠。篤學為通儒。

隋 凡一人

禮部侍郎許務本善心

許善心。字務本。新城人。祖茂。梁散騎常侍。父亨。仕梁至給事黃門侍郎。在陳歷衛尉卿。領大著作。善心九歲而孤。為母范氏所鞠養。幼聰明。有思理。多聞默識。為當世所稱。嘗踐上父友徐陵陵大奇之。謂人曰。才調極高。此神童也。起家新安王法曹。舉秀才。對策高第。授度支郎。

中轉侍郎補撰史學士禎明二年加通直散騎常侍聘於隋遇高祖代陳禮成而不獲反命累表請辭高祖不許留繫賓館及陳亡高祖遣使告之善心衰服號哭於西階之下藉草東向經三日勅書唁焉明日有詔就館拜通直散騎常侍賜衣一襲善心哭盡哀入房改服復出北面立垂涕再拜受詔明日乃朝伏泣於階下悲不復興上顧左右曰我平陳國唯獲此人既能懷其舊君卽是我之誠臣也勅以本官直門下省賜物千段草馬二十匹從幸泰山還授虞部侍郎時有神雀集於含章

閣高祖召百官賜燕善心卽於坐請紙筆製神雀頌奏之高祖甚悅除秘書丞加攝太常少卿與牛弘等議定禮樂大業元年轉禮部侍郎時陳後主卒善心爲祭文稱後主爲陛下宇文述以爲言煬帝召問有實自援古例事得釋而帝甚惡之又太史奏帝卽位之年與堯時符合善心議以國哀甫爾不宜稱賀帝方自御戎服東討善心復上封事忤旨帝責不平遂免官明年復徵爲守給事郎從度遼授建節尉突厥圍鴈門攝左親衛武賁郎將領江南兵宿衛殿省駕幸江都追敘前勲授通

議大夫詔還本品行給事郎宇文化及弑帝於江都僭位改元隋官盡詣朝堂謁賀善心獨不往化及遣人執而殺之時年六十一越王侗稱制贈左光祿大夫高陽縣公謚曰文節曾孫遠自有傳

唐 共五人

太子詹事陸餘慶

子瑛附

陸餘慶陳右衛將軍珣之孫也方雅有祖風已冠名未顯兄玄表嗜曰爾名宦不立奈何餘慶感激閉戶誦書三年以博學稱舉制策甲科補蕭尉累遷陽城尉武后

封嵩山以辦具勞擢監察御史聖曆初靈勝二州党項誘北胡寇邊詔餘慶招慰喻以恩信蕃酋率衆內附遷殿中侍御史鳳閣舍人封廣平郡公太子右庶子餘慶於寒品晚進必悉力薦藉人有過輒面折退無一言開元初爲河南河北宣撫使薦富春孫逖京兆韋述吳興蔣冽河南達奚珣後皆爲知名士遷大理卿終太子詹事謚曰莊雅善趙貞固盧藏用陳子昂杜審言宋之間畢構郭襲微司馬承禎釋懷一時號方外十友餘慶才不逮子昂等而風流敏辯過之初武后時酷吏用事

宗朝倖臣貴王斜封大行陷利嗇禍之人與相乾沒雖
亟貴驟用而戮不反踵餘慶以道自將雖仕不赫赫訖
無悔尤子璪字仲采舉明經補長安尉以清幹稱開元
初中朝臣子弟不官京畿改新鄉令用按察使宇文蠡
薦遷澠池令累遷兵部郎中東曠騎使還除洛陽令時
車駕在洛摧勒奸豪人不敢犯爲中書蕭嵩所器嵩罷
他宰相俾陰譙嵩短璪口與人交過且不可言况無有
邪以是忤貴近出爲太厠少尹累徙西河太守封平恩
縣男屬邑多虎前守設檻穿璪至徹之而虎不爲暴

給事中徐處仁岱

徐岱字處仁嘉興人世農家子於學無所不通辯論明
銳座人常屈大曆中劉宴表爲校書郎觀察使李栖筠
欽其賢署所居爲復禮鄉名達於朝擢偃師尉禮儀使
蔣鎮薦爲太常博士專掌禮事從德宗出奉天以膳部
員外郎兼博士貞元初爲太子諸王侍讀遷給事御史
館修撰帝以誕日歲歲詔佛老儒者大論麟德殿并召
岱及趙需許孟容韋渠牟講說始三家若矛楯然卒而
同歸於善帝大悅賚予有差兩官恩遇無比性篤慎至

宮殿中語未嘗道之不談人短宗族孤孺皆為婚嫁卒
贈禮部尚書

秘書監馮退思子緘附

馮審字退思東陽人左散騎常侍定之從弟開成中為
諫議大夫拜桂管觀察使歷國子祭酒監有孔子碑武
后所立睿宗署額審請琢周著唐終秘書監子緘字宗
之乾符初歷京兆河南尹以才幹稱

宋共三十一人

工部侍郎錢就之昱

錢昱字就之忠獻王佐之子宋建隆初入貢京師太祖
器之太宗於南府置宴引弓校射一發中的太宗解玉
帶賜之後隨忠懿王俶奉土歸朝改領白州刺史上太
平錄一卷太宗賞其才授秘書監除工部侍郎

防禦使錢明叔弟暄附

錢晦字明叔文僖惟演之仲子以父蔭歷官東上閣門
使時貴州團練王守忠領兩使留後移閣門定朝立宴
坐位晦因言天子大朝會令宦者齒士大夫坐殿上必
為外夷所笑守忠更欲以禮服進酒晦又以為不可勾

當三班院羣牧都監授忠州防禦使知河中府帝因戒曰陝西方罷兵民困久矣卿爲朕愛撫毋縱酒樂使人呼爲貴戚子弟也晦頓首謝尋改潁州復還三班院同提舉集禧觀歷霸州防禦使爲羣牧副使卒弟暄字載陽歷官駕部郎知台州進少府監權鹽鈇副使暄鈞考諸路逋租兩浙轉運使負課當坐暄上言浙部仍歲飢故租賦不登籍今使者獲罪必亟歛於民民不堪矣神宗卽詔釋之尋以光祿卿出知鄆州拜寶謨閣待制卒天章閣待制沈興宗起

沈起字典宗明州人進士高第監真州轉般倉聞父病委官歸侍有司劾其擅去帝謂輔臣曰觀過知仁今由父疾而致罪何以厚風教而勵天下之爲人子者服除特遷之知海門縣御史中丞包拯舉爲監察御史以論典國鹽鈇事不合出知蘄楚二州京東歲飢盜起除提點刑獄至則開首贖法携其伍盜內自睽疑轉相束縛唯恐後遷湖南轉運使召直舍人院加集賢殿修撰知吏部流內銓奉使契丹至王庭其位著乃與夏使等起曰彼陪臣爾不當與王人齒辭不就列遂升東朝使者

自是爲定制拜天章閣待制知桂州未幾代蕭注經略
交趾無功貶團練使安置郢州已而徙越又徙秀卒起
生平喜談兵嘗以兵法謁范仲淹仲淹器其材注孫武
書以自見卒用此敗

少宰劉德初正夫

父載子阜民阜民附

劉正夫字德初衢州西安人父載字子厚剛正有守魁
南省仕檢正以論事忤執政疏乞歸正夫未冠入太學
有聲與范致虛吳材江嶼號四俊第進士除左司諫時
方寃蔡邸獄正夫人對徽宗語及之正夫徐舉淮南尺

布斗粟之謠以諷帝感動解散其獄待蔡王如初他日
謂正夫曰兄弟之間人所難言卿獨能及此後必爲公
輔又言元祐紹聖所修神宗史互有得失當折衷其說
傳信萬世遂詔刊定而以起居舍人爲編修官不閱月
遷中書舍人進給事中禮部尚書太學諸生習樂成蔡
京欲官之正夫曰朝廷長育人材規爲時用而使與伶
官齒策名以是得毋爲士子羞乎東封儀物已具正夫
請間力陳不可帝皆爲之止益喜其不與京同遂拜特
進少宰半歲屬疾三上章告老除安化軍節度使開府

儀同三司致仕病小愈丐東歸詔有輿至內殿長子阜民掖入坐從容及燕雲事曰臣起書生軍旅之事未之學然兩朝信誓之久四海生靈之衆願深留聖思明日徙節安靜軍起克中太乙官使封康國公歸至盱眙病亟命子弟作遺牘自書留神根本深戒持盈八字遂卒年五十有六贈太保謚文憲帝眷命不衰以阜民爲兵部侍郎少子阜民徽猷閣待制

荆湖轉運判官劉先之牧

劉牧字先之其先爲臨安人曾大父彥琛爲吳越王將有功刺衢州葬西安於是劉氏又爲西安人牧生而明敏年十六求舉進士不中曰有司豈在我哉乃多買書閉戶治之及再舉遂爲舉首起家饒州軍事推官與州將爭公事爲所擠幾不免及後將范文正公至牧大喜曰此吾師也遂以爲師文正亦數稱牧勉以學任之以事無不立辦歲終將舉京官牧以讓其同官有親而老者文正歎息許之曰吾不可以不成君之美及文正安撫河東乃始舉牧可治劇於是爲兗州觀察推官改大理寺丞知大名府先是多盜牧用其黨推逐有發輒得

後遂無爲盜者。詔集強壯刺其手爲義勇。多懼怖。不知所爲。欲走。牧諭以詔意。爲言利害。皆就刺。欣然曰。劉君不吾欺也。用舉者通判廣信軍。以親老不行。通判建州。當是時。富丞相弼以樞密副使使河北。奏牧掌機宜文字。保州兵士爲亂。弼請牧撫視。牧自長垣乘驛三日抵其城下。會弼罷出。牧乃之建州。方并屬縣諸里均其徭役。人大喜。而以外艱去。通判青州。又以内艱去。服除。通判廬州。朝廷弛茶權。以牧使江西。議均其稅。蓋期年而後。反奏事。得請人皆便之。除廣南西路轉運判官。於是修險阨。募丁壯。以減戍卒。徙倉便輸考攝官功次。絕其行賄。居二年。凡利害無不興廢者。乃移荊州。北路至踰月。卒。家貧。無以爲喪。自棺槨諸物。皆荊南士人爲具。牧初爲范富二公所知。一時士大夫爭譽其才。牧亦慨然。自以爲當得意已。而屯邗。遭流落。抑沒於庸人之中。幾老矣。乃稍出爲世用。若將有以爲也。而旣死。是以掄材者。至今爲之悵然。

判南京國子監方閔

弟閔聞附

方閔嚴之淳安人。博學工文章。與弟閔聞同居太學。每

試必迭爲之魁。時人語曰：兩浙三方天下少雙闕。仕至判南京國子監，閭歷右文殿修撰，致仕。錫號龍亭居士。聞仕歷太僕少卿。

安撫使盧行之知原

盧知原字行之，湖州德清人。以父任累官梓州路轉運副使。時承平既久，戎備皆弛。知原招補兵籍，築城亘二十餘里。王黼當國，費出無藝。知原因疏言之，黼怒罷去。久之起提點京東刑獄，改江西轉運副使。先是綱運阻於重江，吏卒並緣爲姦。知原悉意經理，故先諸道上京。

師進一官，尋除秘閣修撰，提舉河北。以論罷。高宗卽位，復龍圖閣知溫州。時葉濃陷建州，楊勅陷處州。知原繕甲兵，增城浚，湟聲勢隱然。帝東幸，知原由海道轉粟及金繒十餘萬至台州。召見稱獎，擢右文殿修撰，管內安撫使。在郡四年，民繪像祠之。王師討范汝爲，召爲添差兩浙轉運使，罷。提舉太平觀，卒。弟法原自有傳。

錄事參軍何茂恭恪

父榘兄恢附

何恪字茂恭，義烏人。父榘多材略，睦寇竊發，請軍門獻策。主帥楊維忠用其言以取勝，奏補承信郎，監恩州酒。

稅營卒謀爲變，密白郡守而往誅其元惡，釋其誑誤，上功轉承節郎，神武後軍統制劉光世辟主管本府機宜文字，未踰月徑歸，每謂人曰：使吾二子文行有成，勝吾擁使節疏侯封也。恪與兄恢皆感勵而力學，及同上春官，恪中選，恢欣然曰：是足以報吾父矣。遂謝場屋，恪好古藏書至萬卷，博覽而工於文，初主永新簿，再調徽州錄事參軍，未赴，詣闕上萬言書，進恢復二十策，與朝論不合，歸治園構亭，奉母爲樂，所著有南湖集二十卷。

寶謨閣待制陸務觀游

陸游字務觀，左丞相佃之孫也。少穎悟，問學該貫，喜爲詩歌，工文辭，淹諳先朝典故，名振一時。張孝祥以詞翰自擅，獨見游輒傾下之。初以廕補官，高宗聞其名，欲召用，而游以口語觸秦檜，故抑不進。紹興末始召對，褒諭再三，賜進士出身。孝宗卽位，遷樞密院編修官，和議將成，游以書白二府抗陳不便，又代樞臣張燾言龍大淵曾覲招權植黨，熒惑聖聽，上詰知游所代草，怒出通判夔州，王炎宣撫川陝，辟爲幹辦公事，游爲炎陳進取之策，以爲經略中原必自長安始，取長安必自隴右始，當積

粟練兵有彙則攻無則守。又知蜀帥吳挺將叛請以吳玠子拱代之以絕亂階。炎不從。後挺子曦果叛人服其先識。范成大帥蜀游為參議官以文字交不拘禮法人議其類放因自號放翁。預修光孝兩朝實錄成陞寶謨閣待制致仕。卒年八十有五。常以中原未復為恨。每形之詩歌。有示兒詩云。老去原知萬事空。但悲不見九州同。王師北定中原日。家祭無忘告老翁。其恢復之志垂老不衰如此。所著有劍南詩集二十卷。續稿六十七卷。渭南集四十五卷。行於世。

平江守徐吉卿壽

徐壽字吉卿。泌之曾孫也。甫冠登第。令德安。以材薦。召對稱旨。即改秩監都茶場。宰相趙鼎以壽文儒宜在清禁。遂教授王邸。為御史。累遷侍御史。擢戶部侍郎兼權吏書。言者論其有黨。上曰。壽朕親擢。安得是。紹興三十一年。虜亮遣使指索將相。要求壤地。議遣報聘。上獨召壽及前侍郎劉岑。同日見岑。言臣老矣。恨無以報國。當以頸血濺亮衣。上不悅。次問壽。壽對願奉命。與子婿俱往。授次對。為樞密都承旨。過泗。亮遣使馳驛止之。乃還。

明年亮被屠虜請和復使館伴既覲虜使不肯以書授中使嘉徑前敘書以進虜大沮上嘉之孝宗登極以舊職守泉最聞徙帥越進職改守平江壽皇語孝宗曰是嘗手敘虜書者詔過闕覲兩宮治蕪踰年遇德壽慶典進兩階致仕卒

知鄂州莫子濛濛

莫濛字子濛湖州歸安人以蔭入官兩魁法科累官大理寺正吏部火連坐者數百人久不決命濛治之濛察最可疑者留於獄出餘人爲耳目以踪跡之約三日復

來遂得其實繫者乃得釋黃門倖奏親擒盜五十餘人上命濛窮竟既至咸以寃告濛命囚去桎梏引倖至庭詢竊發之由聞敵之所遠近時日悉皆牴牾折之語塞濛具正犯數人奏上餘釋之上諭輔臣曰莫濛非獨曉刑獄可俾理錢穀遂除戶部員外郎命措置浙西江淮沙田蘆蕩以丈量失實責監饒州景德鎮起知光化軍謀金渝盟郡乏舟衆以爲慮濛力爲辦集及敵犯境民賴以濟召復原職上諭曰朕尚意向措置沙田甚不易濛頓首曰職爾臣不敢避怨上曰使任責者人人如卿

天下何事不成。出知揚州。陛辭上以城圯命濠增築。濠至州規度城闔分授諸將。各刻姓名甃堞間。懸重賞。激勸。閱數月告成。除寶謨閣學士。大理少卿兼樞知臨安府。未幾假工部尚書使金賀正旦。金庭賜宴。濠以本朝忌日不敢簪花聽樂。金遣人趨赴濠堅不從。竟不能奪。使歸除刑部侍郎兼臨安府少尹。出知鄂州。卒於官。年六十有一。贈奉政大夫。

吏部侍郎鄭舜舉汝諧

鄭汝諧字舜舉。處之青田人。登紹興進士。穎悟貫洽。出入五經。樞衡諸史。辛稼軒一見推服。曰老子胸中有甲兵百萬。丞相洪景伯薦於朝。孝宗書其名御屏。曰鄭汝諧。威而能惠。時浙東苦旱。舉行荒政。轉大理少卿。持公論。釋陳亮囚。進吏部侍郎。告老。以徽猷閣待制致仕。卒。轉運判官葉實之。篆。

葉篆字實之。義烏人。以世科累官太常寺主簿。輪對言中書政本宜清心正已。以求賢爲務。時宰不悅。改軍器監丞。差知荆門軍。建堡柵。開溝洫。蒐練民兵。人思奮勵。會京帥募建議築城東蒙兩山之巔。篆以山無水泉。且

非敵路條其不便者六置制使趙方不從。秦歎曰：敵民誤國寧有去耳。遂解印綬歸。有旨除夔州路轉運判官。俄復予祠。結廬東山。顏曰：抗雲祠。滿差知武岡軍。未上卒。子由庚傳在理學。

朝請郎王道甫自中

王自中字道甫，平陽人。登淳熙第，以薦召對，論古今兵制，臺壘數百言，顛末具舉。孝宗動容嘉歎，改官爲籍田令、通判郢州。召還，光宗曰：壽皇以卿屬朕，卿姑爲郎以相佐乎？自中頓首謝曰：臣已累壽皇，不敢復累陛下。固請外出，知延州。遷知興化軍。終朝請郎。自中博學能文，章平生尚氣，雖知名勝士，達官知其無憂，當世意直嬉笑，孩視之。陳同甫亮嘗稱其文曰：韓筋柳骨，獨步當時。自謂不能及。又歎今日人材衆多，求如道甫髣髴，不可得。葉水心以自中與亮同墓，志云：志復君之讐，大義也。欲挈諸夏合南北，大慮也。必行其所知，不以得喪壯老貳其守，大節也。春秋之材，無是也。吾得二人焉。永康陳亮，平陽王自中。銘曰：哦彼黍離，孰知我憂。竭命殫力，其爲宗周。於此見二公生平之大節已。

知閩縣胡巖起

父巢子居仁附

胡巖起，婺之永康人。當唐之季，其先自台州來徙。宋南渡後，以進士科發身者十人，持節分符，先後相望。父巢，欽州司法參軍，脫略豪雋，輕貲急施，人以鄭莊稱之。巖起，登嘉定甲戌進士，知福州閩縣事，卓行危論，奇文瑰句。端平嘉定間，士大夫皆以為不可及。其在江西幕府，平贛州之難，於指顧之間，全活數十萬人。子居仁，淳祐丁未進士，知台州軍州事，文辭政事亦絕出於四方。三世才名重於兩浙，一時以為寡壽。

直秘閣趙蹈中汝讜

趙汝讜，字蹈中，汝談之弟。少倜儻，有軼才智，略出人上。龍泉葉適嘗過其家，汝讜年少，衣短後衣，不得避適。勸之曰：名門子，安可不學？汝讜慙，自是終身不衣短後衣。折節讀書，與兄汝談齊名，天下稱為二趙。以恩補承務郎，召監左藏庫，韓侂胄謀逐趙汝愚，汝讜兄弟倡言非是。且上書訟汝愚冤，乞斬侂胄以謝天下。竟坐汝愚黨廢斥者十年。後登嘉定元年進士第，除大社令，累遷司農丞，除湖南漕，遷江東憲，辭除直秘閣，廣東經略，又辭。

仍舊職知温州卒詔以直煥章閣致仕汝讜嘗將旨江湖威聲聳動襄帥趙方嘗力薦以自代嘉定兵端再起獲黃榘阿魯哈羈於潭州汝讜時將漕欲存金以藩韃厚遇之黃榘吐實以二蠟丸書投汝讜未能白其策而卒黃榘在潭聞之歐血死其規畫之不遂天也汝讜常言宗子不忘君孝子不辱身臨難則功業當如宗虛立身則德業當如子政

中書舍人陳介翁力修

陳力修字介翁平陽人上舍優等第一人登紹定第歷官禮兵部架閣被旨督運江東以給豐濠盧壽五月致米三十五萬斛邊儲用裕擢通判泰州改知無爲軍時行和余獨不奉詔除司封郎去之日父老將士攀轅垂泣尋爲浙西提刑海寇蘓六積暴衆所切齒前使者置不問乃設計授吏禽之拷竟其罪嘗手殺平民四十餘立誅之而貸其黨浙石震肅除祭酒都承旨兼中書舍人面對言揆路蔽賢之罪理宗大悟會戚里有以濫恩驟進者格其命遂奉祠去盜起荻浦朝廷欲鎮以舊人乃畀憲節往行訓諭盜聞風解散久之復請祠歸卒

力修識見高邁遇事敢為故所至聲譽藹然久而猶在

進士孫吉甫枝父允子起予附

孫枝字吉甫鄞人父允受業鄉先生沈銖學以真實為

本教授鄉校者十年枝與銖之子煥同游朱文公熹門

同學益精著書解十三篇嘉定間與子起予同登袁甫

榜進士允時尚無恙郡守程覃表其里曰重桂鄉枝卓

邁有智略自秦隴荆襄達之淮海凡邊事軍謀靡不練

習淮海帥延之幕下枝以祿不逮親辭不就起予為昭

武參軍羣卒噪呼於市起予往諭之羣卒羅拜曰孫司

戶清廉官不得犯入朝為監察御史至太常少卿

兵部尚書洪伯魯勲弟熹熹附

洪勲字伯魯咨夔之長子登淳祐四年進士第少為崔

與之魏了翁所知仕至兵部尚書嘗為詞臣發明先皇

與子之意人稱其有父氣骨贈端明殿學士謚文靖弟

熹熹亦與勲齊名皆能紹其家學

元共三人

治中陳剛中孚

陳孚字剛中臨海人自幼清峻穎悟讀書過目輒成誦

至元中以布衣上大一統賦署上蔡書院山長陞翰林院國史編修官擢禮部郎中副尚書梁魯奉使安南詰其世子陳日燁不庭之罪往復三書宣布天子威德辭嚴氣直名重一時尋歷建德衢州兩路治中召為翰林待制改本路治中卒贈翰林直學士嘉議大夫追封臨海郡公謚文惠有天游觀光玉堂交州桐江柯山等集

胡仍仲之綱

弟之純附

胡之綱字仍仲永康人汲仲之從兄也與弟之純皆以經術文學名之綱嘗被薦書自負才名不屑小官遂蒐獵藝林博綜墳典其於聲音字畫之說自言獨造其妙惜其書不傳之純字穆仲咸淳戊戌進士踐履如古獨行者文尤明潔可誦與汲仲同稱時人謂之三胡

明一

共三十五人

刑部主事葉夷仲見泰

弟惠仲附

葉見泰字夷仲臨海人王師取台州見泰衣褐造軍門謁其帥帥趣見語三日夜不休署部從事遂下永嘉取福建收兩廣皆與有力焉未幾使安南卒能論其君長來貢以功授高唐州判官遷睢寧令終刑部主事所著

有蘭庄集弟惠仲亦能文號二葉

刑部郎中詹國器鼎

詹鼎字國器台之寧海人其家素賤父鬻餅市中而舍縣之大家應繇於官者大家惟吳氏最豪貴舍其家生鼎鼎生六七年不與市中兒嬉遨獨喜遊學館聽人讀書歸輒能言諸生所誦吳氏愛之謂其父令兒讀書鼎欣然其父獨不肯罵曰吾故市人家生子而能業吾業不廢足矣奈何從儒生游也然鼎每自課習夜坐餅竈下誦不休其父見其志不可奪遣之讀書逾年遂通其師所能師辭之時吳氏家延師儒鼎就學吳氏亦子育之使學未數年吳氏子無能與鼎談者其師去鼎遂爲吳氏諸子師還邑中諸儒皆與爲禮稱詹先生而不敢慢元末方國珍起海上不能制以重位授之國珍開府慶元求士爲已用是時知向背者以爲國盜也不可輔皆匿不出國珍聞鼎有才以計獲之鼎爲所獲不得已因爲之盡力爲其府都事有廉名一心守法被譖下獄半年乃釋爲上虞上虞與僞吳地相錯軍吏貴臣甚衆以鼎儒生不習邊事稍違約鼎會衆於庭引一驛丞責

以不奉公斬之在庭者皆股栗膝行請罪後雖元帥萬夫長有所陳說皆長跪以言不敢舉目視其面鼎臨事有才簡牘滿前須臾而決暇復與故人賓客出遊四方遊士爭及其門嘗以事過臨海令以下皆迎謁且暮候其市中人相指歎曰學之能貴人乃至此乎至正末我兵臨慶元城下國珍懼乘樓船遁於海上怒欲舉兵誅之莫爲計鼎爲草表謝辭甚恭而辯上讀表曰孰謂方氏無人哉是可以活其命矣乃赦不問更以國珍爲右丞鼎亦召至京師鼎爲書萬言詣闕下須臾駕出上之上上爲之立馬受讀付丞相官鼎揚憲爲左丞惡言事者奉例從居梁又徙陝去數年憲敗凡爲憲用者皆受誅鼎賴此以免在陝七年大臣薦鼎名於朝鼎至京師中書以謫徙人不宜用將還之於陝鼎恐還爲人所輕笑以貲屬掾吏願留掾爲之言於丞相曰詹鼎有奇才以例弃不用可惜丞相不信其人在可召視之非誣也丞相果召見鼎問之鼎髯甚美又能爲梁趙間言步趨進退閑雅有威儀丞相甚喜之稱於衆曰詹鼎尚書才也時河南行省缺郎中吏部請命鼎爲之丞相曰

吾同事以鼎才不可使也待半歲除留守衛經歷改刑部郎中刑部佐僚未完有司請除吏丞相曰刑部有詹鼎在勝百輩其見稱如此鼎在刑部一以寬仁行法威聲不起而人皆樂其不苛刻罪人當分覆者爭曰願得詹公覆我我死不憾會大都督府受賂除軍吏事發誣鼎有賊御史覆鼎言在留守時所養孤甥來省恐有之鼎誠不知御史曰法貴殺有名卒誅鼎與百餘人皆死鼎坐罪薄有才人惜之鼎爲文章氣燄逼古人守身廉重行義好學不廢自陝入京師時聞人有好書價金一斤鼎無金惟所乘驢弃以買書其爲人奇偉如此及死其所養孤甥爲之服喪三年

大理評事顧觀

顧觀蕭山人自童幼時卽一覽不忘善屬文年十六適洪武開科之始遂以尚書領浙江鄉薦第一明年成進士太祖甚愛之日侍左右遇有咨訪呼曰小翰林太祖嘗訪天下利病觀對曰治徒罪以上悉廷審臣民皆苦其煩請自死罪外悉從外省徑決上允之遂爲一代定制尋擢大理評事每審獄必令唱名卒於官年

才二十有四。魏文靖驥嘗從之學，惜其無嗣，爲設主祀之，終其身。

禮部右侍郎蔣良夫驥

蔣驥字良夫，錢塘人。弱冠領鄉薦，舉洪武庚辰進士，授行人。美丰儀，善詞令，在稠人中形神秀朗，獨異若游鱗。矯矯見之者，知非常人。累官檢討司直進、翰林侍讀、侍講學士，與修太祖、成祖、仁宗實錄及永樂大典等書，多所裁定。仕終禮部右侍郎。子琳，卒官都察院左副都御史，自有傳。

禮部尚書李至剛銅

李銅字至剛，以字行。世爲台之寧海人。父塾，洪武初分教華亭，因家焉。至剛少穎秀不凡，嘗從學楊蘆夫。爲詩文有清思。洪武戊辰舉明經，奉命侍懿文太子，初授禮部試郎中。既實授，坐累謫戍邊，無幾召還，爲虞部郎中。尋陞河南布政司右叅議。會河決汴隄，居民危懼，至剛建議假王府積木作筏濟之，人賴全活甚衆。調湖廣左叅議。太宗文皇帝入正大統，至剛來朝，大臣多言其才者，且洪武舊人，遂以爲通政司右通政。且暮在

上左右道說洪武中事甚親密尋陞禮部尚書時禮部之務叢控至剛長於剽繁修理井然益見寵遇永樂二年冊立皇太子命至剛以冊書兼左春坊大學士東宮開經筵至剛與春坊大學士解縉最先進講及修永樂大典四方羣儒皆集仍以至剛董之無幾爲侍郎宋禮所間遂見疏歲餘降儀制郎中然遇劇務必以屬至剛仁廟嗣位念舊功臣復以爲通政數月又念其老不任朝叅出知興化府時朝廷方需仁澤於天下至剛仰祇德意勞心撫綏郡民德之甫再歲歿於官年七十

南國子祭酒陳光世敬宗

陳敬宗字光世慈谿人登永樂會聚榜進士時選俊才二十八人以應列宿之數入翰林讀中秘書名曰庶吉士而敬宗與焉文皇帝自教之令內府給以書籍筆札工部布几席擇近居與處以便宣召禮部給夜誦膏費光祿供饌醞茗果食罷許出遊息仍免朝謁自是益得以沉潛經史百氏之言上時至閣試之勗其文行期與韓歐並驅後先敬宗愈加磨礱奮發會纂修永樂大典命敬宗等考正譌謬書成授刑部主事入史館修

太祖高皇帝實錄改翰林侍講嘗獻北京賦平胡頌元
夕觀燈賜宴偕儒臣應制賦詩上獨稱善宣德改元
母憂起復勅修兩朝實錄未成轉南京國子監司業秩
滿陞祭酒力以師道自任不少厭倦嚴立教條痛革舊
習君常持敬以身爲表率諸生或有所稟嚴於對君之
禮時比監祭酒李時勉約束諸生身教亦嚴世稱南陳
北李云敬宗平生剛平介潔勢利紛如一無所累評者
謂其撓之不亂澄之愈清官太學二十餘年諸生位有
至卿貳者而敬宗獨久不調意豁如也景泰元年引年
致仕德望文章名聞天下退而家居不輕出入有被接
見者雍容談論莫不感發興起別號澹然居士至是號
休樂老人有詩文十八卷曰澹然居士集卒年八十一

刑科給事中陸中善

子珪附

陸中善字中善慈谿人洪武丁卯由國子生授刑科給
事中正直敢言聲譽日起逮文皇帝北巡留皇太
子監國以尚善蹇義金忠爲詹事以中善爲丞與侍講
楊士奇共總青宮之政小心慎密夙夜匪懈後坐解縉
事出爲交趾丘烏令未幾復職疾亟謂其子曰當今仕

宦爲子孫、罹禍者比比、吾歷官二十年、受知二聖、竭忠守分、以清白遺汝、吾目瞑矣、仲子珪承家學、爲儒官、

尚寶司少卿朱永年祚

朱祚字永年、寧海人性聰敏、九歲能詩、永樂八年、以秀才徵試事、詹事府尋爲鎮遠侯家塾教官、十三年進元宵觀燈賦、上喜而賚之、由是知名、洪熙初、用尚寶司少卿袁忠徹薦、擢行在中書舍人、宣宗見其詞賦處之近密、特陞翰林院修撰、秩滿陞尚寶司少卿、命教中貴人、祚能詩能文、援筆立就、負氣好直言、不恤毀譽、晚

稍自懲、因號默齋、正統十年正月卒、

辰州知府何彥容頤

何頤字彥容、仁和人、永樂甲申進士、官刑曹郎、持法嚴不撓、貴勢京師爲之語曰、母縱誕、避何鐵面、受知成祖、每大獄、親呼頤名、使決之、出知辰州、裁抑豪強、凡鎮守、總戎殘擾市肆者、悉舉正、其罪未幾致仕、歸家居十年、不入城市、以子琮貴、贈通政使、

翰林庶吉士柴廣敬欽

柴欽字廣敬、餘姚人、祖用中、父伯玉、皆早世、母陶氏、踵

其姑跡力守節以不隕柴氏家聲欽九歲孤然得所仰給以就師問業不隳志於他技雜巧者母之力也年十二三時爲詩文往往有長成人調度鄉前進器重之皆謂伯玉有子永樂癸未捧鄉書明年上春官第進士時太宗文皇帝初御極拳拳於作興儒術文士選進士中穎異之尤者二十八人象天之列宿使爲庶吉士翰林欲其盡讀天下書必如古聞人之能以文名當世欽在列益感激奮勵務盡其學窮日夜而書不絕聲累積之厚故施諸文也質而華汪洋而沉着不蹈襲陳腐而駸駸欲追古人轍跡尤善爲賦每出一篇輒玩味人口會朝廷纂修大典徵天下遺書備採摭欽進言其師國學典簿趙撝謙訂聲音文字通可收錄遂奉命馳傳卽其家取之既至京師與纂修職分修禮樂音韻書日進退於館閣勞心思於考索編著縉紳皆閱其勤善其平生清苦刻勵天性然也卒以劬瘁致疾歿年僅三十有六京師士大夫不問交不交者莫不惜之

少詹鄒汝舟濟

鄒濟字汝舟餘杭人冲和易直表裏洞然不爲崖峻刻

削之行、洪武初、以明經授本縣學訓導、被薦入翰林、預修高廟實錄、永樂間、知平度州、爲政廉平、簡重、頗以寬厚得吏民心、進禮部郎中、從征安南、累遷左春坊左庶子、位望清華、不敢驕溢、侍東宮、朝夕講誦、待遇優渥、陞詹事府少詹事、卒之日、家無餘貲、惟藏書數千卷、宣宗登極、念講讀舊勞、贈太子少保、謚文敏、

太僕寺少卿沈升

沈升、海寧人、永樂初、登進士、入翰林、爲庶吉士、授刑部主事、與修五經四書性理大全、累遷至太僕寺少卿、升立朝好獎拔善類、凡同年同官中有文武才能堪爲時用者、亟疏薦之、後皆不負所舉、人多賞其鑒識、

監察御史陳廷章憲

陳憲、字廷章、定海人、永樂中、由進士擢監察御史、巡按湖廣、江西、莊重知憲體、其在江西、政績尤著、糾察方面及郡邑吏之賢否而去留之、無不協於輿論者、南昌之民、舊苦三司供給、郡縣因之以爲利、憲悉革之、民大稱快、安吉守禦千戶臧清、貪淫兇暴、爲殺人破家、殆不勝紀、都司受賂、常曲庇之、監司直指、雖知之、莫敢何問、憲

至庶得清殺一家無罪三人執訊引伏械送京師一郡
宴然抃舞於道未幾以代歸而同官以鞫獄出入相訐
者皆引憲初鞫爲證遂并下刑部憲恚甚已得微疾旣
事白宜釋矣以覆奏未報尚羈獄中時施禮署部事寬
而無制屬吏肆爲姦弊凡死罪繫獄者悉得自便臧清
雖罪狀明白尚繫獄未決夜竊至憲所詬詈捶擊之憲
不勝忿竟以宣德三年十月卒於刑部於是公論皆咎
禮後上問侍臣曰聞御史陳憲能持身振憲紀今安
在侍臣以實對上深惜之因是不直禮後有告清他
罪者立命磔於市

陝西左叅政李孟博約

李約字孟博仁和人永樂甲申進士授兵部職方主事
左遷交趾通判未幾復職歷九載陞廣東按察司僉事
每行部審繫獄聽讞精明直枉立判冤繫者多所平反
人皆稱之調山東復入爲兵部員外郎兩使朝鮮不抗
不隨人謂得使命之體時胡寇西部陞陝西左叅政督
餉事竣還朝有僞稱校尉求郡邑賂遺者約籍其賊械
送入京事連塞北邊軍及京營衛士反誣約居職方時

受遺容隱約歎曰自弱冠受朝廷厚恩今已斑白何心復與健兒置對邪遂投劾去既歸深衣幅巾徜徉山水間絕迹公府雅有士望年七十六卒

山東叅議孫子良

孫子良錢塘人洪武間貢入太學登永樂甲申進士第選爲庶吉士與修永樂大典書成拜武選郎中成祖北狩以尚書方賓從行命子良攝部事時兵政繁劇子良應答如流大爲監國所眷注侃侃持正請託不行人多忌之子良本以郎曹領部鈐制屬吏同列滋不能羣口交妒遂落職謫交趾布政司吏目夷俗素不知學子良善道誘之皆喜漸濡德教多有成者洪熙改元以言者薦起掾屬拜交趾參議已調山東督理河道上章乞休卒年七十八子良少喜學詩出入唐宋諸大家所著有螺城集四卷行於世

刑部郎中鄭良載厚

鄭厚字良載仁和人篤志問學祈寒暑雨未嘗去書詩文典雅居然以方家稱登永樂甲申進士第授武選司主事陞南京刑部郎中臨事周慎未嘗有過以持法不

阿忤時致仕歸卒厚自祖父世承詩禮一門內外循循雅飭罄欬不聞服食起居咸有軌則未嘗隨俗浮靡鄉以善守家法稱之所著有虛車集三卷

兵部尚書徐良玉琦

徐琦字良玉世爲錢塘人祖德富成寧夏而生琦天姿英毅耽翫經史至忘寢食以蔡氏書中陝西鄉試登永樂乙未進士寧夏之有進士自琦始也授行人遷兵部職方員外郎宣德間黎利倡亂南部廷臣議撫之擇庶僚有才望者以行乃擢琦行在右通政持節往諭旣至利拜命畢遣人議相見禮琦曰吾奉 上命至爾首盡禮使者卽所以尊朝廷禮何庸議利聞卽趨拜坐下坐所餽悉拒不受還遷兵部右侍郎未幾 上復命琦賫

勅問黎利往年抗拒王師之罪并定歲貢常例至則利死利子麟蓄疑未服琦宣布朝廷威德曉以禮義示以禍福辭旨英暢意氣慷慨一國竦聽無有不帖服者由是麟感戴 上恩乃鑄金人一以代躬謝仍備方物遣陪臣以進闕廷 上大悅宴賚特厚遂命落琦戎籍蓋異數也進南京兵部尚書叅贊機務留守南都二十年

深沉果斷每臨大議衆論盈庭徐以一言決之衆皆悅服卒謚忠襄

僉都御史陳廷詢詔

陳詔字廷詢青田人少英敏絕倫日誦萬言以尚書魁永樂庚子鄉薦登宣德庚戌會試第一除監察御史遷四川按察副使時閩浙盜發溫處屠掠尤慘上素知詔威望特拜都察院僉都御史命巡撫浙江勦平山寇詔至論以利害不煩寸兵斗粟而寇悉平事聞上大悅陛見錫賚甚厚將論功崇爵一夕疾作卒於官先是郡省運金帛鉅萬犒軍委詔不問出入詔例給羨餘卽封還府庫無所私麾下歎曰此公家物也乃棄不取何爲其廉靖類若此

南京太常寺少卿夏韞輝瑄

夏瑄字韞輝太師忠靖公原吉之次子少聰穎喜讀書嘗竊觀忠靖奏草及忠靖朝退必請問所議事忠靖笑曰是非爾所知也然心默喜之仁廟嘗顧問忠靖曰卿子年幾何欲以近侍官之忠靖曰臣子幼稚非食祿時俟成立事陛下未晚也宣德五年忠靖薨宣廟震

悼不已。卽日遣中官致命於家。拜瑄尚寶司司丞。明日瑄入謝。時年十三。進退有度。特賜冠帶衣服。瑄將扶柩歸葬。宣廟閔其幼。特免守制。使養母於官。而別遣行人護喪歸。且厚恤其家。瑄強記過人。張太師輔呼爲小友。蹇少師義而下。多瑄父執禮。重之。時雲南夷逆。命瑄上疏乞立功自效。尚書王驥竒之。欲以瑄往。有沮之者。乃已。尋命署本司事。時四方多事。瑄上疏陳七事。多見採納。十四年。虜犯京師。瑄憂憤陳四事。一謂虜乘勝遠。聞鋒不可當。宜堅壁勿戰。使進無所得。退復氣沮。然後出奇設伏。諸道奮擊。破之。必矣。一謂虜旣舉國人寇。邊無所禦。且調邊兵之半入捍京城。內外夾攻。彼將自潰。一謂我軍依城爲營。進無死志。退有所歸。宜嚴號令。以堅其志。如以三隊爲法。前隊戰退。令中隊悉斬。以徇則士畏法而不畏敵矣。詔亟行之。後虜使至。瑄又言虜無故遣使與吾譯者偕來。必佯爲遜辭。以緩我。應援揣我進退。覘我虛實。或爲誑事。虛情以亂我謀。或賂我譯者。令爲反間。宜慎防之。以觀其變。又謂虜若引退。宜分兵五路。間道襲之。以正兵二路當其前。以竒兵二路攻其

傍以伏兵一路絕其後。又以宣府大同諸路邀其歸。蓋彼方恃強不虞吾至。且待使回犯我而我先奪其心勢。可必破。况今太陰犯昴主胡不利。太白出齊用兵敢戰。吉臣以爲天道人事機不可失。瑄又言虜旣得利。今冬來春必圖再寇。今汝寧鳳陽諸府及河徙故地流移之民無慮百萬。恐因潦而動爲患不淺。願假臣便宜使招募智勇以爲國用。仍條陳事宜以爲先。召吏士及其故老俾各舉所知。凡舉主及所主勞以酒幣。揭名於旗。以倡忠義。然後榜諭。凡有知兵敢戰習騎射諳地利能爲間諜者。許以官賞。復其家一丁以給其力。事平之後。不願爲兵者釋之。教閱之法以百人爲率。擇其能者十人以教其九十人。兵集旣衆。又習戰法。可以捍京邑。可以消外變。事下兵部尚書于謙。請試用其才。監察御史王備亦請勅瑄募兵淮揚。會事定不果。久之以母老乞就養。留都命掌南京尚寶司事。內艱服除。復陳三事。一曰賞罰以爲禦將。不可不嚴。任吏不可不寬。宜罪敗師棄守之將以戒不忠。增廉官能吏之祿以勵不任。二曰去利以爲善治國者。不損民以益己。因舉近事以利致害。

者貪虜入貢，致生邊患。窮兵麓川，以疲中國。其弊在上，污吏賣民，以妨文治。貪將虐兵，以耗軍伍。其弊在下，宜減浮費，以輕徭賦。省游食，以足軍儲。惜民力，以培邦本。又謂貴州宜仍洪武舊制，置行都司，罷藩臬郡縣。命一良將輔以文臣，使專決於外，以寧邊患。三日，審機以爲制，敵之機係乎攻守之得失，因舉近事之失機者。虜初寇大同，氣銳鋒利，不當戰而與戰，以致敗績。一也。宣府懲彼失利，畏慎太過，虜經其城，當戰而不與戰，以致土木之敗。二也。及虜越重關，犯畿甸，自納其死，而我過爲防禦，無所施措，以致大變。三也。宜鑒覆轍，懷遠圖揚，天威以雪國耻。大學士高穀見瑄疏，亟稱其才識，疏薦於朝。不果用。奉使秦府，克冊封副使。凡所賜遺，悉不受。還遷少卿。成化二年進正九載考最，陞南京太常寺卿。仍掌尚寶司事。無何以疾卒。未卒前五日，猶力疾草疏，大略言臣伏見太宗文皇帝賜皇太孫勅諭，皆農桑軍國爲政治民之要誠。祖宗貽謀之至意，願陛下置諸左右，覽而行之。仍命皇太子讀誦，使預知民事艱難。守成不易，則不必遠求諸古。而天下可治。臣懷此言。

未敢輒上、今臣病旦夕死、此而不言、永無日已、命其子崇文上之、訃聞、遣官諭祭於南京、

僉都御史陸仲輿矩

陸矩字仲輿、世家湖之歸安、父斌坐累謫戍河間之阜城、矩遂以戍籍登宣德癸丑進士、授刑部四川司主事、陞郎中、奉命從征閩寇、是時主將不戢、士道途所經、民不勝其擾、矩自總戎嚴制之、凡號令敷奏之文、一出矩手、軍士屏息、不敢出氣、至則賊渠已死、餘黨據山寨、自固、官軍分道並進、矩與副將保定伯梁瑄獨當一面、併力以攻、刻日破之、擒其僞將、而悉釋其脅從者、闔境以平、以功拜都察院右僉都御史、鎮守真定、諸郡當虜寇侵掠之餘、民徃徃離散不止、矩百方招輯、發德州廩粟數萬石、賑其飢者、民志始定、以憂去、服闋、參贊延綏軍務、陞辭、賜楮幣二百錠、至軍、號令一新、未逾月、廢墜者日以修舉、邊人私相告戒曰、今之參贊、非昔之參贊比也、不可犯、明年春、方行邊、冒風雪得疾、亟還、竟不起、時年四十有八、將佐以下弔哭之、皆哀、軍士有出涕者、真定諸郡民間之、皆巷哭為之罷市、

大理寺卿湯正傳宗

湯宗字正傳平陽人初由太學生擢河南按察僉事陞山東按察使左遷刑部郎中永樂初擢蘓州府知府時郡連遭水旱細民轉徙逋租百餘萬石無所出宗不忍迫促諭富民出米代輸富民知其能愛民者皆從其令不三月逋賦悉還又坐事左遷知祿州以薦召授大理寺丞時外夷貢使病死使者從人謂醫殺之獄成宗閱牘歎曰夷人知醫素無仇怨寧有故殺之理卒辨其誣河南水患民多流移仁宗在東宮稔其才命往賑之比還命署戶部主事未幾坐累繫獄者十餘年仁宗蒞祚立出之復大理丞俄進左少卿陞南京大理寺卿宣德元年命清理戎籍於山東時天久不雨宗極陳民間飢饉疲困之狀即日召還勅有司免租稅蠲徭役罷不急之務二年正月卒年六十有三訃聞遣官賜祭命有司治葬

刑部右侍郎葉景暘春

葉春字景暘海鹽人幼警敏知學有才識洪武中舉自邑史歷事吏部者六年永樂初禮部尚書李志剛知其

通練薦於朝。擢禮部主客司主事。以勤敏周密爲上官所重。陞郎中。再陞兩淮鹽運使。改福建布政司右參政。宣德元年。以蕪松常鎮嘉湖諸郡姦吏土豪肆爲貪虐。以毒細民。久而愈甚。特降璽書。命大理卿胡槩與春巡歷訪察。務去惡以寧善。後又益以錦衣衛指揮任啟。監察御史賴瑛。槩等奉命。所至秉公推明。行之以果。無所屈撓。於是數郡之內。氛翳廓清。畎畝閭閻。咸有生氣。時事之裁制。一董於胡。然在春之鄉。知之素明。而行之無私。視諸人尤難。事竣還奏。上嘉之。數人者皆進官。

春。進刑部右侍郎。歲中邁疾。卒年六十有四。

左副都御史邵以先

邵玘。字以先。蘭谿人。中永樂乙酉鄉試。明年成進士。授

廣東道監察御史。慨然以功業自期。明憲紀。究律意。而用法平恕。至遇巨奸滑爲民厲者。亦不少寬假。聲譽遂起。嘗巡按江西廣東福建。克振風裁。時仁宗皇帝監

國。尤所簡知。間刑部都察院大理寺缺。堂上官率命玘署。有重獄。數以付玘。玘感上知遇。夙夜盡心。每事親理。有所顧問。應對詳明。一時老成多推讓之。陞江西按

木望
卷之二十九
察使先是南昌新建二縣苦上官和買長里役者供一日費家爲之空玘視事之日立罷之惟聲溢路而私不便者皆側目焉然視玘自用簡儉亦莫敢一語侵之在江西五年政用肅然改福建治職如江西而有司之務倍繁稍濟以寬人稱得體宣德三年召爲南京都察院左副都御史時南京諸司緩弛而御史尤縱玘奉勅簡擇黜其不肖及庸懦者殆半繼奉勅偕六部長貳簡黜諸司之不肖庸懦者綱紀大振玘爲人內寬外肅仕二十餘年所歷中外皆風憲於條例故實與夫施措之宜默識明習所至糾合官邪舉大體而略瑣細有所薦舉必清介士其廉潔之操蓋始終一轍卒年五十有六

監察御史陸子達和

陸和字子達江山人以進士任監察御史巡按中外凡九年力持風裁所至百司戒飭嘗奉勅監軍禦虜降俘塞道立朝抗疏直言甚裨治體京師號爲鐵面

工部尚書王原之來

子鑰附

王來字原之慈谿人領宣德元年鄉薦會試中乙榜授江西新建縣學教諭被薦擢監察御史巡按直隸蕪松

常鎮諸郡風采凜然尋奉命考覈守令而下貪暴者望風引去正統初陞山西左叅政調廣東先是倉儲久腐奏以歲徵折銀餉邊寬西北人民轉輸之勞上嘉納

定爲令陞河南左布政使時流民數十萬屯聚奏請土著撫御備至卒彌其患已巳河水衝溢乃築堤植柳捍之民賴其利景泰元年陞都察院右副都御史撫諭河南湖廣比虜犯京師聞召卽率兵馳至衛輝以寇退引還尋陞都御史時貴州苗賊猖獗命總督湖廣軍務以勦之縛其渠魁常同烈等而撫定其餘黨師還召見便

殿慰勞之轉南京工部尚書兼大理寺卿條陳時政十二事多見采納蒞事逾年疏剔釐正百後就緒英宗復辟賜致仕成化改元詔進一階卒年七十有六來偉姿貌少俊邁不羈善詩有奇語臨事明達事無大小面訊立斷奉命宣力四方所至以治辦稱子鑰中浙江鄉試授監察御史

禮部尚書王一寧

王一寧僊居人父俊用以鄉貢官國子監丞寧隨父居京年十三已能詩仁宗在東宮聞之召試早過銀河

詩立書七言絕句以進深見嘉賞十八以詩經中京闈鄉試又四年戊戌舉李騏榜進士尋以外艱歸家居十年始至京師會宣廟求文士甚切吏部以寧應召見試表正萬邦論及詩賦皆當上心擢吏部主事俾與大學士陳山等共事於文華殿未幾改任翰林修撰與修宣廟實錄書成進侍講以母喪歸服闋克進講官尋遷禮部右侍郎奉勅往湖廣督運糧餉隨軍進勦苗賊措置有方軍興不乏景泰二年被召還京理部事遷左侍郎晉通議大夫無何以疾卒訃聞賜賻楮萬緡遣禮部官諭祭贈太子太保禮部尚書謚文通命有司歸其喪并爲營葬域寧爲人闇敏而疏達爲文必根於理詩詞翰墨清絕可愛孝友忠信之行尤爲人所稱卒年僅五十有六有才而見於用不旣世共惜之

巡撫都御史陳德清濂

陳濂字德清鄞人登正統乙丑進士授南京刑部主事明習文法如吏師進員外郎陞廣東按察僉事轉副使巡視海道海故盜藪而圍山又瀕海盜勢猖獗濂輒親冒矢石出奇應變日夜露禱誓不與賊俱生忽雷電交

作風雨晦冥盜迷曠相擊殺俘馘無算海南肅然歷陞
廣東左布政使尋陞巡撫廣東都御史廣人益欣戴頌
聲大作時荐歲兵興供億師旅勞止日甚濂懇懇矜惻
如或傷之尋奉命總督漕運勤疏濬立程度輸運無後
期者兩淮故南北孔道諸豪家漁獵貲貨率多暴橫凌
啖庶姓悉裁以法善良咸獲其所丁內艱去適河南缺
巡撫上謂非濂不可詔起復濂辭不許灑泣就道未
幾改命巡撫北直隸兼巡紫荆諸要害明年上計漕
運事重還濂原任比至淮疾作卒於蘓

應天府尹彭中孚信

彭信字中孚仁和人景泰辛未進士選讀中秘書擢山
東道御史巡歷紫荆諸關塞邊烽爲之無警巡撫廣東
時嶺南未靜武將專征頗易信儒生及出師誓衆信爲
帥指陳方略揆度事機切中竅綮卒之殄滅夷獠兵無
挫衄信功居多倖奏帥以彼所得賞格信信曰吾文士
也吾自有階奚以武爲識者偉其功而多其不伐內艱
服闋改貴州道巡按陝西歲滿且代藩憲交章願留謂
關右民悍勁其與懦者至不能自立信治之強者鋤弱

者植威惠並行得憲臣體。上從之爲留信再期而後復命巡按河南當是時信爲御史秩滿且代而復留者再巡歷諸藩無寧歲其勞績茂著。上在東朝雅知之及卽位首擢順天府丞奏最階中憲大夫進尹以疾卒於官信爲人性度坦夷人謂其有納污藏垢之量至於遇事敢爲果斷立發則又謂其不苟柔吐剛云卒年五十有二壽不竟其材用世者惜之。

左春坊左庶子周中規旋

周旋字中規溫之永嘉人正統丙辰擢進士第一入翰

林爲修撰進侍講景泰壬申懷獻太子立進左春坊左庶子兼侍講如故授奉政大夫又明年是爲景泰甲戌正月二日夙興方盥擲造朝忽得疾遂卒旋六歲喪父未冠又喪母毅然自立入郡庠爲弟子員卽奮發刻苦於學儕輩咸推讓之每科舉必以魁自期雖屢弗偶而其志弗少挫卒用有成入翰林適詔選庶吉士俾績學中秘益進修不息其聲隆起儕輩復推讓之如諸生時同考壬戌會試得劉儼所作大加稱賞擬置高等同事者沮之旋不平爭之愈力已而廷試儼果大魁人皆服

其識未幾而景皇卽位慨然曰安夏壤夷此其時也上疏萬餘言皆當時急務其於親賢遠佞講學勤政之類語尤剴切多見納用進講經筵與修歷代君鑑皆受白金文綺之賜卒年五十有八旋與人交傾肝膽不事畛域爲文章耻陳腐務出己意爲奇語每作輒呼酒引滿三數行捉筆一揮千百言立就汗漫演迤理致泓然求者接履戶外而旋應之常有餘有集若干卷藏於家

兵部郎中洪子常經

洪常字子經鄞人中正統戊辰進士觀政兵部尚書鄺埜侍郎于謙謂常有經濟才特疏授武選主事政不沉俗斷斷焚錯綽有裕餘會土木之變埜死謙爲尚書時虜患孔棘奏對勛一以委常每入朝必佩筆札以從事至且語且疏卽不草立上進員外郎郎中英廟復辟謙被讒死讒者復誣常爲謙黨上特原之讒者齟齬不止遂誣常吏以姦敗當事者聞於常常曰彼罪當則可如以常故則不可時侍郎陳汝言素惡常不附已遂因都指揮李進事誣常入進賂私庇之上亦置不問會西鄙多故命兵部尚書馬昂徃征之昂言部署乏

人。上問洪常安在昂以憂去對詔起復之遂奉勅與陳武平伯會訊夷人常徒步往陳高其節以白金八十兩餽常買馬謝不受久之昂薦爲本部侍郎讒者忌之遂劾昂私常遂乞骸骨歸家食三十年非歲時飲射不至公府蕭然一室左圖右書宴如也常爲人謙恭廉潔不問家人產重然諾好抵人之急嘗捐俸歸僚友李鳳喪倡義葬主事李山如其高誼類若此

少詹事司馬恂如恂

子壺附

司馬恂字恂如山陰人自以宋溫國之後思輯其休光在鄉校出入動止皆有常度正統中貢入太學祭酒李時勉延教其子尋中順天鄉試第一拜給事中使朝鮮朝鮮主素知恂名尊禮特異有所餽遺峻却之朝鮮至今猶有能誦其詩文者在職論事能持大體不爲苛察英廟復辟帥同列極論人臣懷二心者慷慨引義擊刺椎奸辭甚切至然敦厚周密椎奸欲中傷卒無可乘者未幾遷爲春官贊善是時石亨曹吉祥內外相要結朝士多趨附之恂獨簡默自守亡何亨敗附者皆獲罪而恂竟以敘遷進少詹事兼國子祭酒敦禮範衆持其科

條諸生毋敢自便者尋以病乞歸司馬氏自宋來清白相承至恂歷顯仕服習如寒素其文學政事爲一代名臣卒贈禮部侍郎遣官祭葬如禮子在刑部員外郎亦篤行能文章稱世家云

湖廣叅政倪良弼輔

倪輔字良弼平湖人生而穎異讀書過目輒成誦天順間由進士授吏部主事三載遷郎中剔姦革蝨不避權貴嘗奉命冊封秦楚二藩餽遺悉却之歸惟圖書數冊而已陞湖廣叅政一介不苟撫治洞徑如赤子恩信所及無不感悅卒於官士民哀思如失怙恃所著有類劇藏稿獻存稿藏於家

禮部右侍郎汪伯諧諸

子舉賜附

汪諧字伯諧仁和人御史澄之子舉天順庚辰進士第改翰林庶吉士授編修纂修英廟實錄一時稱爲良史錄成進修撰歷陞右庶子選侍東宮講讀誠心啟誘孜孜夙夜及孝皇帝登極進少詹兼侍講學士克經筵講官修憲廟實錄克總裁擢禮部右侍郎兼學士屢疏乞休歸諧博學強記深沉不泄有大臣度持身整

潔如玉界尺事母極孝居喪枕塊遂得痺疾卒贈禮部尚書子舉賜皆進士舉官太常少卿賜至副使

工部尚書胡共之拱辰

胡拱辰字共之淳安人正統己未進士授縣知縣有

惠政擢監察御史英廟北狩屢疏以選將保邦修德

弭災為言尋陞左叅政轉左右布政使歷左右副都御

史南京工部尚書成化中儲位尚虛拱辰率諸大臣疏

乞早定國本拱辰平生清謹所至以興利除害為務在

貴州兩廣四川督勦叛夷為都御史時提督操江勞績

可紀者甚多年七十懇乞致仕而歸弘治辛酉 孝廟

特賜之月廩歲隸正德改元遣官以璽書存問賜隸廩

有加三年正月卒賜太子少保謚莊懿賜祭葬如例拱

辰卒時年九十三大老居退林下獲享榮壽若拱辰代

不多見人以之方諸魏文靖云

副都御史陳宗之鎬 弟欽附

陳鎬字宗之其先會稽人占籍南京欽天監成化丙午

舉應天鄉試第一成進士授禮部主事歷山東提學副

使湖廣右布政使進右副都御史巡撫湖廣明年以病

乞歸命未下而卒。錡明敏有吏幹。董學時校閱精當。得士心。巡撫時平漢沔之盜。民賴以安。錡與弟欽同科進士。而皆有才名。欽亦官廣東提學副使。兄弟文衡一時以爲盛。

兩浙名賢錄卷四十四目次

才望

明二

太常寺卿王惟臣獻

太常寺卿呂秉之憲

吏部侍郎楊惟立守卮

翰林院編修戚文湍瀾

河南布政使楊名父子器

雲南布政使薛之綱綱

翰林院檢討朱文佩綬

刑部尚書屠元勳勳

子孫附

工部尚書俞德彰琳

刑部尚書韓大經邦問

父附

都察院右都御史周南

翰林院學士豐原學熙

吏部左侍郎李子暘旻

四川左布政使陶時明照

左長史張廷光景明

右僉都御史徐章甫錦

副都御史陸容之鈿

季父健附

副都御史王天宇應鵬

右副都御史錢可容宏

河南按察副使陳約之束

大理寺少卿羅質夫輅

右僉都御史秦懋功鉞

右僉都御史張子清瀛

侍讀學士姚維東涑

刑部侍郎楊章之大章

廣西按察使陸選之銓

刑部主事胡文徵憲仲

監察御史沈汝材楠

太常寺少卿傅朝鳴佩

南京司業朱象玄大韶

副使卜吉夫大同

弟大有
大順附

四川副使顧日翔紳

國子助教司馬式古軫

禮部尚書閔師望如霖

禮部尚書秦子豫鳴雷

廣東左叅政吳汝瑩玳

禮部尚書汪振宗鏜

福建左叅政馮明卿臯謨

右春坊屠文升應垓

子孫附

廣東右叅政管道夫見

廣東副使王育叔裸

祖父附

湖廣右叅議蔣汝才勸能

兩浙名賢錄卷之四十目次終

兩浙名賢錄卷之四十

東海徐象梅仲和氏謨

武塘丘遂叔遂氏閱

才望

明二 共四十九人

太常寺卿王惟臣獻

王獻字惟臣、仁和人、天賦穎異、羈貫日誦數千言、過目

即終身不忘、年十七、領鄉書、登景泰辛未進士第、與狀

元柯潛等二十八人、同進學東閣、賜居第、及大官酒饌、

及膏紙費命內閣大臣典領之不別立師傅不出就外
署一如永樂初科故事獻感際遇益肆力於學工古文
詞在同官中最稱敏贍尋授編修修寰宇通志陞修撰
入內閣授中貴人書癸未春同考會試會貢院火秋復
試復爲同考是科先後兩入簾不改命者唯獻一人已
而聞父喪卽日陞辭星夜行抵家治喪葬戚易兩至時
日與鄉人接恂恂謹厚無一毫早達貴侈之態人以爲
難尋用薦起復之疏乞終制服闋陞左春坊左諭德兼
修撰克經筵日講官陞翰林學士賜金帶本朝學士非
典密務侍日講者皆不與是賜蓋異數也丁酉朝廷用
儒臣議追崇先聖禮樂遣獻祭告闕里比還適所嘗與
修宋元通鑑成陞詹事府少詹仍兼學士戊戌皇太
子出閣命侍講讀於文華殿與修文華大訓成陞太常
寺卿兼官如故蓋自擢第入翰林歷三十有七年先後
握院章者十有六年而年已五十餘矣後進推之爲先
達知已期之於大用然訖不登樞筦履要劇少展其抱
負以死君子惜之

太常寺卿呂秉之憲

呂憲字秉之嘉興人文懿公原之子生有異質書過目輒成誦甫貫卅卽精故訓尤善度時事多曲中文懿竒之以蔭補國子生授中書舍人猶刻志文學居常手不釋卷每以不階身科目爲恨上疏乞應試報可言者以爲非例憲廟獨允之遂中順天辛卯鄉試仍官中書秩滿遷主客員外郎進郎中時琉球國乞歲一入貢謂子之事父定省不可間其意實利於賈市以自便耳廷議難之而患無辭憲請折之云若知父子之禮當遵父命衆服其言西夷回回奏乞取廣東道歸國朝廷將從之憲執不可曰西域貢有常道更之恐有他篡且經涉江海萬餘里勞費將不貲遂寢其奏擢南京太僕寺少卿故事太僕馬數不得爲人所窺文卷例不刷浸以磨滅登耗無所於考憲曰他官不與知是也太僕所掌何事而可罔聞乎乃建白凡馬政卷許太僕官歲一照刷以爲例未幾改通政進太常寺卿祀事多更張卷牘浩穰至或相牴牾乃采輯累朝沿革爲條例若干卷事至按而行之至今賴以無誤大學士楊一清稱其志存澤物而久官閒散不克自展布其政事終爲文學所掩云

吏部左侍郎楊惟立守陞其兄事於文。文名擅天下。楊守陞字惟立。文懿公守陳之弟也。文懿文名擅天下。守陞家自師友稱文豪。舉成化戊子鄉貢。第三。戊戌禮部第四。廷試第二。授翰林院編修。歷官南京吏部右侍郎。進左。七十引年。進尚書致仕。逆瑾竊政。矯詔奪所加秩。瑾敗。乃復家居。七年。一日筆語於冊曰。學文師韓吏部。學道師程伊川。官同吏部。二品。壽過伊川。二年。文章可得而聞望。道而未之見。困學勉行。老而不倦。守正疾邪。至死不變。越五日卒。壽七十七。贈太子少保。遣官諭祭。葬如例。守陞文學論議。隱然有文懿風。履歷亦略相似。而舉解元。爲學士。爲少宰。對署兩京翰院。亦稱奇云。

翰林院編修戚文湍瀾

戚瀾字文湍。餘姚人。以庶吉士歷官編修。雖居木天清華之地。而意象翛然。常欲駕風雲而斥八極。覺非人世榮利可得。而羈笈者。天順初。予告歸省。歲餘。詣京。晚渡錢塘。風濤大作。有絳紗燈數百對。照耀江水。丈夫九人。帕首袴鞬。帶劍乘白馬。飛馳水面。一舟皆懼。瀾曰。毋懼。我知之矣。推窓謂九人曰。若非桑將軍九弟兄耶。皆跪。

而應曰然曰去吾喻矣。須臾風息浪平。灩即命舟人返棹。歸謂家人曰。吾某日逝矣。及期沐浴朝服端坐。頃之向九人者率甲士來迎。戈戟旌旗晃耀閃爍。遂卒卒後車騎騰蹕前後。若有所呵衛者。隱隱入空而滅。

河南左布政使楊名父子器

楊子器字名父。慈谿人。成化丁未進士。授常熟縣知縣。因時立政。畫然歸於禮法。稅入常後期。下令先輸者無。禮期日逾。加既乃以多益寡。耗足轉稅。而民無敢後考。最召補吏部考功主事。轉陞郎中。驗封。每與同官談治。

體自六部達諸鎮。能歷道其故。及當變通之宜。北虜時時蹂塞下。嘗陳邊務數十事。大司馬以爲才。孝陵山陵初起。子器聞有水石爲病。上疏極言之。下詔獄。執不變已。而果然。遂還舊職。時逆瑾方橫。會有議薦者。擬子器翰林。聞之。亟爲書辭於內閣。事爲之寢。當是時。辭難處。辭尤難識者。韙之。未幾。遷湖廣右叅議。分守辰常道。會榔桂賊起。遂請改道。自效。冒暑提兵討平之。陞福建提學副使。以進表至京。會轉河南右叅政。時方以榔桂積勞成疾。而東賊且將渡河。天又寒甚。有勸緩行者。子

器亟騎而往。至嵩縣，卽居守。賊方走湖廣，子器曰：賊逼土兵，必復向汝州、洛陽。籓籬備不可缺，乃自嵩馳赴之。賊至，子器輟食登城，晝夜調度。手書示城中人曰：不上城，及上而輟下者，皆斬。旣而有將下從賊者，卽斬以徇。城守益堅，賊遂引去。進右布政使，以湖廣郝貴功受金綺之賜，入覲北行。卒於衛輝之驛舍。年五十有六。子器性介直，濟以和易，與人交能以量容，以情恕，不能以辭色假。故人於子器無喜怒，而有媿感。性惡華侈，仕至方伯，服食如平生。時有媿遺於故舊，儀而不貨，或問之，子器曰：吾生平惡貨，交而顧交人以貨，是居已於清而居人於濁也，故不敢。

雲南布政薛之綱綱

薛綱，字之綱，山陰人。以進士拜御史，巡按陝西。其所建明皆邊防大計。已督學南畿，學政振舉，擢湖廣副使。督學如初，歷廣東按察使，雲南布政，皆善其職。以老乞歸，尋卒於家。綱簡直夷坦，不矯激而能持正，爲文醇雅，有深沉之思。所著有三湘集、榕陰鼓吹等篇，藝林多稱之。吏治文學，遂爲一時冠冕。

翰林院檢討朱文佩綬

朱綬字文佩秀水人成化丁未進士授翰林院檢討侍
岐王講讀弘治庚戌王出就府邸奄宦專權輔導臣僚
殆爲虛位綬據例抗疏孝廟是之頒行諸藩國自是
政務悉隸輔臣永遵舊典越遷楚藩左相內艱服闋改
相晉藩時王年耄世子世孫俱薨有欲竊柄者幽王魯
孫於別宮潛奏權國上下疑莫能決綬密疏有王魯孫
在乃得封晉事始定丁外艱歸楚藩以綬奏請於朝復
起相焉未幾乞休先後爲國相二十餘年方正不阿有
董江都之醇雅而無賈長沙之牢騷不平卒以壽終於
正寢天下以是賢之所著有四書輔註易經精蘊等編

刑部尚書屠元勳勳

子應填應坤孫益玄仲律叔方孫謙附

屠勳字元勳平湖人成化己丑進士授工部主事改刑
部歷員外郎郎中凡諸司大獄多付之鞫讞精明法比
人稱不冤遷南京大理寺丞晉少卿請差官審錄革煩
例陞都察院右副都御史巡撫順天永平整飭薊州諸
路兵備嘗分三路屯兵使緩急相援虜聞遠遁迄任不
飛尺羽又增黃花鎮諸營堡以固聲勢至今爲利寶坻

歲供銀魚中使因之橫索勲上疏極言請約束無以困民又奏罷麻峪山採礦民甚稱便已遷刑部右侍郎尋轉左會河間戚畹與民爭田而鬪勲勘曰母后誕育其鄉而與細民爭尺寸土大非國體卒歸田於民已丁母憂服闋改左副都御史尋陞右都御史正德改元陞刑部尚書未幾乞休加太子太保致仕卒賜祭葬謚康僖著有東湖遺稿子應埏副使應坤叅政應垓諭德自有傳垓子益玄封吏部主事仲律知府叔方憲副孫謙提學副使皆成進士有令名

工部尚書俞德彰琳

俞琳字德彰臨安人成化丁未進士授行人拜監察御史進鴻臚寺少卿儀度安整音吐宏暢擢右通政再轉通政使仍掌寺事每讀疏大廷朝宁傾聽其任鴻臚及銀臺者皆十許年累官太子少保工部尚書仍掌通政司事琳天性醇樸無巧偽習慷慨尚義嘗以忠孝自許為工部日值塞北有警上曰保定五府武備當嚴非其人不可乃命琳兼右僉都御史往視師琳毅然星駕指授方略既戡定邊患戢兵歸朝口不言兵士論多之

初爲行人嘗使周府舟次歸德感疾甚篤仰天歎曰丈夫志在四方卽不幸客死命耳奈老母何因痛哭失聲是夕忽夢五老人鬚眉皓白語琳曰爾母壽高爾病亦當尋愈毋多傷琳叩姓名答曰此地五老人耳且訪之則宋太子少師杜衍侍郎王渙司農卿畢世長郎中朱貫馮平年皆八十廟食其地云

刑部尚書韓大經邦問

父弼附

韓邦問字大經會稽人父弼耿介有學長於詩官襄府長史邦問因舉湖廣鄉試成化中登進士第授大理寺評事慮囚四川多所平反出知淮安府節冗費辨滯獄又集漕卒禁私鹺其所設施不爲苛察而人畏服久之以都御史巡撫江西時中官駐饒燒供御磁器因而恣橫需索閭里驛騷邦問力言小民凋弊狀上感動輒止之後以刑部尚書致仕卒於家邦問雅性坦直不妄笑言其居雖逼城市而出入甚罕至士大夫以國典民隱造質輒響答忘倦身雖退而不忘經濟如此里人至今想其丰采卒謚莊僖

都察院右都御史周南

周南縉雲人由進士除應天府六合縣知縣。選授四川道御史。彈劾不避權貴。按安遠侯柳璟不法。朝廷肅然。陞湖廣按察司副使。歷陞副都御史。巡撫大同。有邊功。爲劉瑾所惡。置大同獄。瑾誅得釋。復巡撫宣府。尋改南贛。陞右都御史。總督兩廣。以疾乞休。家食十有四年而歿。訃聞。詔予祭葬。贈太子少保。南居官以才略見稱。宦轍所至。勲績爛然。初。大帽山賊流劫三省。攻城殺人。兇鋒不可撓。朝議用重臣督勦。乃以南往。未幾。遂破賊。斬獲數千計。因移兵攻姚源賊黨。及汀漳山巢。悉平之。遂

撫其地。南贛巡撫之設。自南始。

翰林院學士豐原學熙 子坊附

豐熙字原學。鄞人。生而穎異。志趣超卓。讀書精舍。嘗著其壁曰。立志當以聖人爲的。遜第一等事於人。卽非夫也。十六遭母喪。水漿不入口者數日。倚廬三年。郡守姜昂器之。曰。此吾郡顏子也。舉弘治乙卯鄉薦。已未廷對。孝廟親閱卷。大奇之。置第一。已而易置第二。特賜狀元袍帶。嘉寵之。授翰林院編修。陞侍講。與修孝宗實錄。轉春坊右諭德。時逆瑾用事。朝士多媚之。熙獨不爲禮。

瑾銜刺骨。出掌南京院事。尋父歿。喪之如喪母。既免喪。疏乞終養。繼母不報。復原職。時才望隆赫。中外士莫不傾心。謂宜握持鈞軸。以襄化理。而忌者陰沮之。久之不調。世宗皇帝御極。陞學士。詔定大禮。熙議不合。方進用事者。撼以危禍。冀得附已。而熙卒守前議。不變。遂得罪。戍鎮海衛。居十有三年。杜門著書。絕口不言時事。未幾而彗星掃文昌。遂卒。熙性嚴重。不妄交一人。其可者必肫肫見中底。而不可者。卽通顯人。未嘗跡其門。故卒與世齟齬。博極羣書。而尤潛心六經。爲文古雅。典則不規。規模擬而出入。張弛一不盪於矩度。至金石之作。尤其所長。所著有魯詩正說。古易傳義。禮教儀節。白庵集。一齋集。子坊。鄉舉第一人。嘉靖癸未進士官。終南京吏部主事。以能書名。

吏部左侍郎李子暘旻

李旻字子暘。錢塘人。成化庚子鄉試第一。甲辰廷對狀元。及第授翰林院修撰。預修憲廟實錄。克經筵官。陞左春坊左諭德。上疏乞終養。不許。尋侍東宮講讀。陞南京太常寺少卿。署南京國子監事。正德丙寅召修

孝廟實錄改太常寺少卿兼翰林院侍讀仍修玉牒克
講官賜金帶奉命授庶吉士業尋陞太常寺卿管國子
監事晉南京吏部左侍郎未任卒旻爲人長身修髯狀
貌英偉逸才淵識倜儻高邁其學無所不窺貫穿百氏
流覽藝林卽素稱博洽者多推下之善於談議每發言
如倒峽懸河四座傾聽然跣弛不羈濶略世故每於人
多齟齬云

其四川左布政使陶時明照

陶照字時明菊隱君之裔也世居秀水之雁湖菊隱且

戒子弟弟仕元於是陶氏世稱隱德八傳而爲照當
敬皇帝時年甫二十餘與兄煦同舉進士於是人目爲
雁湖二俊復稱陶氏名家照始官工部都水司主事內
艱起復改刑部錄囚蘓松出爲廣東按察司僉事時蠻
徒羣起爲盜惠潮清遠間蜂屯各數萬人照察土官陳
朝亮才授以方略畧糧逮捕不煩帑藏而廣地悉定未
幾以父憂起改湖廣尋陞四川布政使叅議時藍鄙作
亂蜀人驚擾先是照過新都道衝而無城照卽日命城
之城畢而寇至人賴以安竟以平馭功授從三品俸加

賜金綺陞四川按察司副使備兵威茂改河南陞雲南
右布政尋轉四川左先是爲雲南時有大盜橫行喟哉
間阻險深入歲不能下照至卽平之於是詔復賜金綺
照性斤斤簡飭言不出口未嘗面可否人至所歷乃表
表以武功見當事者始知照爲大才可備國家緩急用
無何而竟以中讒去家居幾十年無一語怨尤時時謂
人曰布政司錢穀謗翕翕易起人炫廉自飭而吾于徐
弗以外讒當逆瑾時人有官不患不能顯而吾優游舊
僚要之無疚耳與鄉人處油油煦和生平無怒容雖輿
臺臧獲弗嚴斥也一時皆稱長者卒年六十有七

左長史張廷光景明

張景明字廷光山陰人幼聰慧日誦千餘言舞象作文
卽多奇警童卅補邑庠弟子員試輒高等同輩多歛衽
下之成化庚子領鄉書庚戌成進士第時睿宗皇帝
初開藩邸長史馬政輩以不職罷孝宗皇帝命吏部
擇廷臣中負才望可以輔佐王者尚書王恕卽以景明
爲左長史袁宗臯爲右長史人多惜此兩賢遠弃藩國
不得大用者景明日賈長沙董江都不有聞於時乎忻

然入謝。睿皇諭之曰：卿等皆名賢，當大用。今屈卿爲輔，幸共黽勉，以善聞於世耳。景明等頓首謝。明日上疏勸睿皇正心謀學，以周公及漢東平、河間爲期。又獻爲善最樂詩，以寓規諷。深見嘉納，賜金幣以酬。讜言居數歲，從之。國詔賜四品服，國事無巨細，皆經畫。有法上書陳六事。睿皇優旨答之，仍賜金帛。久之，以憂去。睿皇上書請虛其缺，以待。越三歲，返國。睿皇晏駕。

世宗爲世子，方在諒陰，令攝國事。中外肅然，尋病且革。語其僚曰：死何足恨，但嗣君幼冲，不得終輔之，以酬先王之厚德耳。言訖而瞑。時人皆惜其才，不得大用。卒後旬月，世宗入繼大統，念舊輔功，追贈太子少保、禮部尚書、文淵閣大學士，謚恭僖。

廣東左布政使謝于吉廸

謝廸，字于吉，元輔遷之弟。登弘治乙未進士，釋褐兵部職方司主事，轉武選司員外郎。是時文牒旁午，揮遣若流，悉中肯綮。時稱其才。正德初，逆瑾亂政，兄遷以不合罷相去。瑾移怒於廸，勒令致仕。廸怡然退處林下，嘯詠自適。若將終身焉。世宗登極，懋隆治化，思用舊臣，起

爲江西右叅議尋晉河南按察使未幾遷廣東左布政使入覲還任以疾卒於途。廸具逸才久鬱弗施起廢以來益圖奮勵以答明主之知故其叅議江右時發奸摘伏人稱神明以績最薦兵備九江九江地爲江湖要衝自逆藩煽變之後凋弊弗堪事多可慮廸乃除其煩苛務爲綏緝民賴以寧河南按察時風裁愈肅獄無滯囚事至立剖揮遣文牒如流水僚友旁觀無不嘖嘖歎服嶺南之擢事先要領裕民剔弊不遺餘力論者謂廸深於經學不尚詞華發於舉措鑿鑿可行有補於世才識明敏足以濟之使天假之年得盡其才事業所建尤當有不可量者惜乎其遽止於斯也卒年六十有三

右僉都御史徐章甫錦

徐錦字章甫

人正德丁丑進士初授福建甌寧縣

知縣三載考最拜南京廣東道監察御史出按淮陽及廣西等處整飭大體不事煩苛事竣會建仁壽諸宮奉勅督理同事多中官每索取常例不一滿望則多端沮勒錦委曲開諭備述官民輸運之艱中官爲之感動反從寬恤上嘗錄錦名於御屏曰是可大用旣而陞南

京大理寺丞進太常寺少卿聲望益著會推順天巡撫上覽疏問中官曰少卿徐錦得非向御史乎親簡注焉獲拜都察院右僉都御史巡撫順天兼督理薊州邊備值星變引咎自陳乞休恩賜致仕家居每遇聖旦必沐浴具朝服拜祝於庭賦性寬和與人輒夷易未嘗以貴顯自尊大故其卒也人多惜不盡用其才云

右副都御史陸容之鈞

季父健附

陸鈞字容之鄞人舉正德甲戌進士授南京車駕司主事會寧藩稱逆駕幸留都兵部尚書喬某叅贊機務每事必引鈞籌之曰我益友也陞署職方員外郎隨駕旗牌官輩例分守城門依勢騷擾鈞日爲點視錯綜其時中官有不服者正色折之以義八月駕回鈞已別遷渡軍非其職矣喬尚書曰此非陸郎中不可鈞乃行處之以體卒無譁者嘉靖改元出守安慶安慶經宸濠之變毒於兵燹財竭民疲重以飢饉流殍紛然鈞至以撫綏爲首務從簡易非捕巨猾吏卒不至鄉邑民甚便之而訟日減嘗訊囚堂上忽市中譁然報曰縣囚劫獄且直趨府來矣鈞顏色自若麾坐者列所訊囚拽於階下徐

捕逸囚皆獲。蓋兩囚相通。舍此取彼。則乘而跳梁。兩不可禦。鉦沉機應。變破其謀。囚卒就駢首。誅陞貴州按察司副使。整飭龍里等處兵備。先是鉦季父健嘗僉憲於貴政。有體要名聲。赫然聞鉦。命下凜凜。相戒曰。四明陸公來矣。下車出令。果慰所望。有龍猴二場。軍夷貿易。每因而致亂。鉦使巡捕官軍彈壓。剛暴者執之。取死囚數人。箠死於場。衆爲帖然。歷陞四川廣東江西福建藩臬使。晉都察院右副都御史。巡撫保定等處地方。會聖駕南巡。鉦倉卒經畫。至忘寢食。候駕發而回。機減骨立。人有不識者。先是都護軍門及諸中貴皆有厚望。或偶語於馬前曰。君記得送往迎來否。鉦應曰。記得。更記得節用而愛人。遂爲蜚語。所中落職歸。鉦偉姿山立。氣度豁如。不設崖岸。而確然有不可奪之志。好積書博覽。孜孜不倦。以是自老云。

副都御史王天宇應鵬

王應鵬字天宇。鄞人性貞嚴。沉毅年十六游郡庠。卽有志經濟。挺然以豪傑自負。登正德戊辰進士第。授嘉定縣知縣。以最召拜監察御史。彈劾無所避。時武宗數

徵行及取佛烏思藏、鵬伏闕爭之，以清戎入閩兼理。齟政興革得宜，民用不擾。尋出按山東，務持大體，錘邪剔蠹，不數月而風清。齊魯改督學畿內，擢河南按察副使，仍督學政。進山東按察使。甫三月，擢僉都御史，撫畿內。達軍王朝相等弄兵，一鼓討平之。境內安堵，無何而晉寇陳卿倡亂，當道謂非應鵬不治。改撫山西，先聲所攝，不廢隻矢而俘禽元惡。尋丁外艱，服闋起，副都御史。總憲內臺，條陳時政，以義利名實四字悟上心，言甚剴切。竟以誣劾落職歸。怡然山水間，觸物題詠。若將終身焉。兩臺交薦，默不應。未幾以疾卒。鵬天性孝友，戶庭無間言。於物無所嗜好，雖榘量不識。顧獨好尚論古人，卽在仕途未嘗廢學。不妄言笑，作事確有定守。遇變故不懾，徐應之無不立解。若熟諳者。世以是稱其才。所著雜稿凡若干卷。

右副都御史錢可容宏

錢宏字可容，錢塘人。正德戊辰進士，授刑部主事，轉員外郎。陞山東按察司僉事，轉副使。時武皇南狩，供應靡紀，極當事檄宏取分隨事經緯。貴近弗能屈，章丘潦

歲大侵，宏賑卹，有方全活幾萬命。時巨璫鎮守，後民無常時，宏首裁之，不少徇。民間宏名，輒以手加額，曰：「錢使君青天也。」進廣西按察使，持憲有體，馭從僮有恩，比入覲，諸酋長率衆送道左，蓋曠事也。陞福建右布政使，轉湖廣左、擢都察院右副都御史，提督南贛軍務，南贛地屬上游，不可一日弛武備，乃刻武藝圖以訓將士，躬自臨閱，軍聲大振，會疾作，懇乞歸，歸三年而卒，年六十有一。宏平生嗜學好問，所著有江樓遺稿，尤工漢隸，日臨池不倦。宏之先本汴人，扈宋徙錢塘，玉泉山祖兆之左，有司所營葬也。

河南按察司副使陳約之東

陳東字約之，鄞人。生而穎慧絕倫，日誦數千言，汎濫百家，上下屈宋班馬之間，向褒以下弗論也。海上詩書之士無不爭言陳生。會稽董中峯，玘有女待年，擇聳，或言陳生佳，乃艤舟甬江之上，呼陳生視之，而陳生垂髻被儒者服，繩趨而前，面如凝脂，目如點漆，望之非閭里嬰兒子也。玘乃雜難墳典、丘索及諸莊周呂覽言，則滾滾對不塞，試之詞賦，食頃輒辨語盡玄秘也。玘喜，目左右

取日書以來親爲期日而遣之已乃挈至京邸玆日爲
程業課肄之東唯唯奉命然其心弗好也竊取古人書
意所契會者鉤纂精微時時論撰發舒淵意而京國詩
書之士又無不爭言陳生已乃成進士授翰林庶吉士
讀中秘書益游神塵壒之外以極宇宙之變態每一篇
出諸學士兢締觀之曰斯捕神彈鬼之文乎而東顧施
施自得不少貶改諸貴人竊慕其風時在駕過之輒閉
戶不納時當道被 皇帝隆遇朝士咸奔走之東獨不
一而每歲時上壽不得已望門投刺輒馳馬過之當道
銜之入骨積不能容乃注湖廣僉事分司辰沅東疏乞
骸骨不報轉福建提學副使尋徙河南督學如故時科
試且廼坐肩輿一晝夜馳三百里諸郡之士三月而試
畢以過劬嘔血死東博洽高融洞古聖哲之微言無與
人周旋款語無不滿意比歸休舍輒仰屋慨嘆憤恚踣
跡家人莫喻其故第左右列古圖史置酒一壺且誦且
飲飲輒數盃已而忽大嘔血溘與可數升蓋才高而用
非其所故鬱鬱若是死無以爲歛同官經紀之送其妻
孥以歸所著詩文若干卷唐應得刻而傳之

大理寺左少卿羅質甫輅

羅輅字質甫其先嘉興之秀水人國初以間右實京師遂占籍江寧登正德戊辰進士第授中書舍人冊封益王世子中道正使遽卒命專節以往比至藩邸諸所舉錯中禮度一時稱其才復命疏乞就養得改南大理評事抵家三日而父以無疾卒得親視飯舍人以爲孝感服闋補前官未幾擢江西袁州府知府三載政成都御史王守仁薦其才堪治劇改贛州其治最一如袁復以都御史盛應期言江西劇郡莫若南昌又疏改南昌至郡七月聞母病竟弃官歸久之復補南昌南昌人夾轂迎之者載道曰我父至矣輅第以治袁與贛者輕重布之紡績農桑男婦雙課而南昌復大治擢江西按察司副使整飭饒撫兵備越七月思母復上疏乞休未報卽還家五月而母卒復得親視飯舍如所以喪父者人益以爲孝感云服除補四川按察副使兵備建昌未至移山東南三月擢順天府丞明年改大理少卿時晉宗室與撫臣構隙上命輅往勸輅正國法而體人情復命人皆稱平於是廷臣益多其才兩舉節鎮上曰廷尉

不可以無輅不報無何而以微疾卒年僅四十有九訃聞上痛惜之遣官諭祭異數也

都察院右副都御史秦懋功鉞

秦鉞字懋功世居餘姚之梅川正德癸酉與從叔濮州守吉從弟吉安守金同舉於鄉人稱其盛甲戌登進士第授湖廣攸縣知縣考最召拜江西道監察御史彈劾不避權貴以風力稱未幾巡兩淮鹽政出按江西監試事陞山東按察司副使兵備徐州歷進山東按察使所至有政績得憲體尋陞右布政使時廟建方輿下工部

議取給外省鉞以徵歛繁多恐竭民用乃盡閱郡邑存貯贖鍰以克其需白於當道者猶豫以爲難會京兆尹張漢亦請開府庫罷征求疏入得允當道乃服而才望益隆轉江西左未上擢都察院右副都御史巡撫江西攬大綱廣慈惠簡練兵馬克實邊儲士庶允孚境內大治夏相公言嘗稱鉞十郡銷兵九江渡虎非溢美也無何簡命佐理院事竟以外官考察引疾歸歸而築室吳山之麓優游泉石不復談時事母歿勞哀過常忽遽未疾卒年五十有九鉞長身偉貌丰格標異立論侃侃襟

度豁如也。爲文淳古，以辨博濟之。居官整飭，備明治要。百務紛集，移時而判。其才識過人如此。子二伯宗、孺淮。府右長史仲宗道，山東布政司右叅議，亦以才望稱。

右僉都御史張子清瀛

張瀛字子清仁和人，弱冠領浙江鄉試第一。戊戌成進士，初授刑部主事，勉修職業，爲大司寇所倚重。未幾以才望改吏部稽勲司主事，毅然以進賢退不肖爲己任。晉文選司郎中，志操益勵，義所不可冢宰不能奪。士大夫有負時望而權貴人欲抑之者，或時論所不予而權

貴人欲庇之者，皆從容諷諭，務在獎恬退，抑奔競，獨立行一意而已。權貴人雖陽然其言，而多陰銜之，請謁不行，苞苴無所用其力。一時仕路爲之肅清，擢通政提督，謫黃樞，貴人雖陰銜之，然無所修其郤。會虜入寇，瀛以守都城有聲，遂出瀛爲僉都御史，提督畿南北諸郡屯田事，蓋以使能爲名而寔遠之也。未幾復坐訕左遷，瀛不就，曰：吾以直道不容於時，今而後無復有能其官者矣。遂拂衣歸，歸則買山，列亭榭，種名花異卉，又別穿池，種五采玳瑁粉黛之魚，仰而嘯俯而臨流，以自適。客或

勸之出則笑而不答。瀟負經世才，期一大展以報。聖天子卒為媚者所中，一蹶不復振，而託趣林泉以自老。其志亦可悲已。顧論者不量，猶借嚙嗜之口為達者，詎病何異仰蒼旻而議寥廓耶？歸安茅坤銘其墓有曰：託盟范蠡，比迹留侯，睥睨一世，耻屈貴游。左右若遺，僅託書碣，書之何以天地一喙。

侍讀學士姚維東涑

姚涑字維東，兵部尚書鏞之子。母夢吞日華與五色鳥投懷而生。六歲喪母，哭踊如成人。七歲就學，聰慧強記，能屬文。嘗於途得遺書，遂引楚人亡弓，楚人得之，以為序讀者稱奇。及長，脩髯偉幹，顧盼燁如。居恒議論，輒以天下為己任。舉正德丙子鄉試第七人。嘉靖癸未禮部第二人。及廷對，遂魁天下。拜翰林院修撰，尚書亦自延綏還，拜工部左侍郎。父子同詣闕謝，縉紳以為榮。明年大禮議起，涑偕臣僚伏闕諍之，同杖於廷，尋復官。克經筵日講，丰儀峻偉，陳義誠切。上多嘉納，進左春坊左諭德。與修明倫大典，疏請帝王廟去元世祖主，以正華夷之分。奉勅校累朝寶訓成，賜宴內廷，加錦繡襲

衣晉侍讀學士主丁酉北畿試得士多登甲榜文詞爾雅爲天下式未幾居尚書喪孝勤備至遂感疾卒後上嘗問髯狀元安在或以卒對上深爲悼惜特賜祭涑明達魁岸其學長於史務求政要爲經濟事不拘拘文辭嘗曰三代而後漢與外戚共天下唐與女后宦官共天下魏晉以下與膏粱子弟共天下宋與白面書生共天下元與族類共天下我朝皆無之可謂盛矣但邊防海運最爲今日急務遂作邊圖凡道途往來關隘險阻之處指諸掌謂海運當講於平居時又曰中國之兵強夷狄之兵弱創業之兵強守成之兵弱蓋草昧法簡而嚴中世法繁而寬簡而嚴所以用命繁而寬所以多敗又論學曰大凡論學不可立黨立黨則必爭奚能見道昔者朱陸之辯虚心求是也今日之辯朱陸私心求勝也言愈多而道愈晦矣持論侃侃聽者忘疲

刑部左侍郎楊章之大章

楊大章字章之餘姚人嘉靖癸未進士授知瀏陽瀏陽號難治奸民逋稅累鉅萬且狡猾善訟不可窮詰章則根究弊源庶務迎刃而解奸民爭先輸逋無敢後邑豪

李鑿者特貲犯禁無忌肆毒隣境甚至拒兵殺官以叛章一旦出不意單騎卽其巢擒之以故強梗豪俠之徒皆縮頸改步不敢犯瀏陽號大治外艱服除補知歙章治歙如治瀏陽亦大治以卓異徵擬臺選已當事有忌之者改刑部主事公論殊不厭章曰吾方憂職之不稱豈以刑部爲少耶未幾改兵部擢武選司郎中銓事吏多緣爲奸章嚴具條格抑絕徼侍吏惟坐聽行文書而已而予奪遲速一出於獨裁天下武弁待選者以得遇爲幸遷山東按察司副使兵備霸州霸州固盜藪而亡命胡廷秀直入都城白晝劫殺人從西直門出人莫敢近章選驍騎一二跡其向往追至臨清縛來斬之不啻如几上肉以武清滌縣地廣居民無城可依適歲侵議及時興工繕築以寓救荒之意不數月而功成不惟土著者恃以無恐而流離就食之衆全軀保妻子者不止數千人頌聲載道無何坐武選貼黃註誤乃左遷江西布政司經歷三轉而陞福建叅議遷湖廣副使兵備荊州轉叅政晉南京鴻臚寺卿改光祿陞工部右侍郎轉刑部左當是時鄭端簡曉爲尚書素重章凡獄情重大

者必虚心咨章章亦爲之詳盡必當而後已天下洗然無冤民無何以微疾乞身歸章雖家食而念切憂時每聞朝廷有善政未嘗不躍然喜及時事少不當意則仰屋太息不已歷官四十餘年清約不異寒素惟養父母則竭力滄髓不敢以貧故儉其親一時稱之曰孝卒年七十有八

廣西按察使陸選之銓

陸銓字選之鄞人嘉靖癸未進士除刑部主事改禮部儀制司晉郎中時上方稽古禮文以隆制作議四郊九嬪親蠶親籍諸禮內降旁午而討論陳奏頃刻數四宗伯大臣盡倚以爲辨莫不當上心資望功賞皆宜得右秩而內閣輔臣以圖上祭器不先關白遂大忤意遷福建按察添注副使益爲策勵嘗攝海道漳故盜藪而利窟也諸射利奸人多以厚貨餌監司闌出爲患銓獨嚴立禁網剗剔奸蠹卒不爲諸射利者餌陞河南叅政撫民南陽陞廣西按察使時弩灘徭賊侯公丁雜處胡藍二姓之間相助爲寇或議大舉兵盡誅之銓曰堅賊黨而分我兵非計之得也不若計殲渠魁而撫其

餘監軍者如其言弩灘果平陞廣東右布政使以內艱
居家卒銓質性英銳讀古書一目卽解解卽不忘搯筆
爲文卽奇氣橫發滾滾莫禦卒不疾於矩度雄視天下
謂豪俊莫能相先而當官蒞政剴繁解劇不啻庖丁之
游刃也時方以偉烈期之而竟齋志以沒識者憾焉

刑部主事胡文徵憲仲

胡憲仲字文徵海鹽人少博雅工古詩文浸淫秦漢晉
魏風骨揮灑之譽重一時嘉靖庚戌成進士官工部主
事工固閒曹仲益喜讀書邸舍下帷篝燈如諸生貸子

錢買古載籍淫誦之巨卿大僚多器仲爭爲折行交應
尚書大猷嘗解所佩刀贈曰此託於呂虔誼也無何虜
闌入郊畿嫚書請市諸大吏袖手無策仲爲條十劄略
曰虜入深矣已已之變于肅愍爲兵部尚書躬帥大軍
駐德勝門外與虜對壘今日之事本兵當擐甲出營相
機勦殺局縮不能議戰而與議市哉此城下之盟也竊
耻之又云鄙生躡屩談說漢帝輟洗迎之伏軾下齊七
十城士被褐負奇欲效勲矢石者豈謂輦轂下無人哉
文吏拘泥以目皮相失不羈士誤甚部曹偉其論俾仲

督造兵械。協巡九門。不嚴而肅。部曹始知仲爲有用才。不徒以虛辭倡議者。虜退轉南刑部。山東司主事。有巨姦麗罪。夜懷百金私仲。仲却之。竟置諸法。兄弟兩監生。爭產淹繫三年。仲誨諭感悟。泣呼胡青天。時倭蹂兩浙。留都戒嚴。仲寓書浙帥。策倭曰。仲浙產歲罹倭。能言倭情。倭屯若散。譎也。疾合如馳。聲拙也。佯見短狀。用奇也。倭進止。盡司馬法。而我師惛惛乘之。逼城潰掠。鄉鄉殘。謂民命何言。三策曰。防曰。困曰。間。傳其言南中南司馬曰。是郎曩言比事。復策倭是知兵。以仲守太平門。亦不嚴而肅。倭知不敢犯。未幾而疾作。仲始究心大業。期以文章鳴世。至憤時疾。事輒裂。皆髮上指冠。欲身當之。垂竹帛。歟而一疾竟不起。年僅三十有九。仲少從鄭端簡學。端簡奇其才。已端簡官考功。仲上之書曰。無使人知吾之所好。無使人知吾之所惡。無使幸者德我。無使不幸者銜我好。惡彰則迎合者不可測。德怨樹則好還者不可禁。端簡用其言。卒稱良吏部。仲學不獨博古。修文辭。每於聖賢微言中。直窺性命之要。嘗與龐嵩論學曰。萬物從虛中來。中庸論誠之爲貴。而不知虛之爲先。

才望
卷之四十一
三十九
虛者物之始也。善之入也。誠者物之終也。善之積也。語多儒先之所未發。所著有仰崖集四書講義。藏於家。

監察御史沈汝材楠

沈楠字汝材。吳興之樟溪里人。嘉靖戊辰進士。授南昌府推官。南昌簿牒藜委。獄情詭秘。楠防檢既周。聽察尤慎。姦欺屏息。請謁不行。以故幽隱畢達。人雪覆盆之冤。市絕橫羅之辟。花園鄉故稱盜藪。役久無功。楠受牒單車詣賊。賊皆面縛悔罪。願釋戈歸農。楠白於部使者。盡解縱之。事聞。有金幣之錫。三載考最。召拜江西道監察

御史。數月。卽真。每有論建務。持大體。同臺宿望。多自以爲弗如。又二年。巡按陝西。下車。問民所疾苦。延見藩臬。諸大僚。咨以吏治得失。及郡中豪不法。政事所宜廢舉。典庶屏墨威。暴澤枯且詢。且行孳孳。若弗逮。又閔延綏兵馬入衛之疲勞。遼薊苑馬寺芻餉之煩苦。西安鳳翔漢中三郡。分辦花馬池鹽課之利害。方欲條上方略。請行之。而觸暑行部。焦勞卽事。竟以劬瘁致疾。卒於耀州邸舍。士民相與悲傷之。櫬發關中。關中入白衣冠而送者如堵。無不執紼夾輿。而號聲震山谷。楠爲人孝友。踈

節而廉於財遠聲色如膩喪父食貧事母曲盡志物撫諸宗族有恩與人交無少長賢不肖咸盡其心絕口不郵傳人過失其篤厚如此卒年僅四十有二

太常寺少卿傅朝鳴佩

傅佩字朝鳴仁和人嘉靖乙未進士授興化縣知縣興化軍竈奪民之田地而不稅不役民貧累逃亡過半至困死無所愬司軍竈者又深庇之而視民如讐前令不敢詰詰輒爲所構往往罷去佩慨然曰若是何以令爲吾奉天子命爲民父母民在倒懸而不解安能覲顏在位哉乃極言宿弊疏上於朝者三必行而後已雖沮撓百計至有擐甲以攻者佩棘棘持議益力卒還軍竈所攘奪於民者民乃甦田賦悉平召拜兵科給事中世廟幸承天佩以才望扈從武定侯郭勛怙寵驕恣不法無人臣禮回鑾之日卽抗疏劾之忤旨奪職佩聞命欣然就道無何郊廟禮成得還章服佩夙稟正直平生無脂韋媵媵態又素有經濟天下志地方諸所利弊有可以裨民生益國計者遇事侃侃論辨不少假聽者無不捧手起敬以是巡撫兩臺咸謂佩宜大用前

後薦剡凡十四上竟不用。穆宗改元廣開言路起用先朝言事諸直臣佩膺首薦又以例當引年僅晉秩太常寺少卿致仕以卒。

南京國子監司業朱象玄大韶

朱大韶字象玄世爲吳興人七世祖尚德贅華亭烏溪里遂爲烏溪人登嘉靖乙未進士第選庶吉士讀中秘書故事庶吉士選者閣臣爲遴次先後以名聞幸上俞允。肅皇帝嘉韶所詠寶善詩拔至第三人韶旣嫻於文而又得以才情自見其思雲涌川決頃刻數千言

立就尤留心經濟凡禮樂刑政錢穀兵戎之數俱縷縷口畫心計每國家有重事諸公相與議輒問朱先生云何已酉授翰林檢討辛亥奉使冊封湘藩道維陽入隆中探南陽鹿門之勝事竣卽登太和浮洞庭望匡廬從大江過金陵三山諸名勝所紀咏著作爲多旣復命分校癸丑禮闈所推轂俱名士時倭寇起東南海上苦兵視親舍越在千里外燕居深念計不令二尊人南而已獨此遂力請得南司業以去先是分宜未柄國時以交驩封公故與韶爲通家及分宜子用事諸附離之者不

可勝數。韶以濡足。樵門爲戒。不與通。分宜子銜之。而又與平湖陸太保有連。太保方貴寵橫甚。韶雖數往還。非其好也。陸意不能無小望。韶雅欲避籍。此自解脫。無何而二怨果修。卻擠之。解韶官。縉紳多爲不平者。韶夷然不屑。曰。吾向已知之。輦上君子肯爲余再伸志耶。歸構樓於城東北隅。置圖史。朝夕觀覽。左右遠眺。自適。取名快閣。歲時行圃。召所厚故人。從命觴奕。談說鄉里事。爲樂絕不問門外事。四方造請碑志序記履。滿戶外。韶投甕以應之。有餘力。雖居陋巷中。而名稱籍籍。無異朝省。時韶負才。倜儻意不可一世。而勇於任事。誠以待人。有古君子風。卒年六十有一。

福建按察副使卜吉夫大同

弟大有大順附

卜大同字吉夫。秀水人。嘉靖戊戌進士。授刑部主事。慮因河南以平允稱。歷員外郎。陞湖廣按察司僉事。先是議者言自九江入楚。蘄黃漢岳會於洞庭。江流彌亘千里。而遙盜負濤浪行劫。甚且攻剽州縣。有司莫能制。宜立上下江防。置憲臣便。詔以大同往。大同旣至。按行謠俗。去民所疾苦。飭封守。立里保。審形勢。定徑防。行期年。

而羣盜屏息遷湖廣布政司叅議有平苗功再遷福建
巡海副使初閩人多入海與諸夷市而漳泉爲甚弗禁
則法廢禁嚴則奸民失利而倖亂徃徃導賊入或且攘
臂羣起以張賊勢最號難治而海禁兼管利權下者既
多自敗其名潔廉者又率避弗肯爲以故海防日益廢
弛而大同毅然任之既修飭內治諸所興革一切與民
爲宜民咸安其政賊亦知有備終大同任三年弗犯閩
而屢寇甌會吳越間攻城掠邑蹀血數千里至動天下
之兵不能制獨閩得大同晏然卒後三年而閩始以警
告大同持身孝友居親喪三年不入壺內課弟大有大
順皆成進士大有令無錫執法不撓樵貴稱彊項中忌
者調潛山歷南儀曹以忤時宰出爲尋甸守大順令當
塗治行稱最召拜銓部歷司勳郎能留意人材卻問遺
不脂膏逐時好並無媿於乃兄云

國子監助教司馬式古軫

司馬軫字式古山陰人平陰知縣簡之子生而狀貌偉
然言動不類嬰孺平陰大噐之長入郡學嚴重簡默文
章華暢聲稱燁然累困名場以鄉選登乙科授贛州府

學訓導。顧士久弗克解。軫誠誨而嚴課之。士爲興起。未幾董越遂破天荒。登進士一甲第三名。陟鳳陽縣學教諭。誨士興學。一若在顧時。再陟國子助教。以微疾卒。年六十有五。軫有大志。抱竒才。恒以古豪傑自期。許欲策竒勲。茂烈以膏。當時照後世。而竟老於函丈。弗克布一籌。以終方官。顧時寧都縣豪有昆弟相仇者。各聚衆至數百人。欲交攻。相殺官莫敢誰何。巡撫者懼其蔓也。預圖之。謂非軫莫可任者。軫輒曰。軫固朝廷臣子。常恨無地自效。今承命。敢後。卽日携一奴躍馬走寧都。萬山中入豪筭。爲明天倫示國法。明啟其自新之路。其言詳悉。洞達而誠懇。諄至豪乃悟悔。泣拜自囚。以見巡撫。軫力勸減豪罪。而賞其餘。卒自新。於是衆稱軫。逮今未脫牙頰。間軫自號端齋。所著有端齋杜撰子。聖編爲十二卷。藏於家。

四川按察司副使顧曰翔翀

顧翀字曰翔。慈谿人。嘉靖戊辰舉進士。授工部都水司主事。外艱服闋。補兵部武選司主事。進員外郎。卽於九邊智勇忠義之士。皆庶訪籍記。每佐其長。以易置無不

當擢河南按察司僉事駐節潁上兼攝徐州兵備道徐
潁地跨江淮多巨猾劇盜號難治紳從容料理案無留
牘豪惡毛至剛占奪民婦女田產恃雄貲無忌紳竟捕
之置於法潁壽間盜多株連不解紳下令日以姻連坐
者勿治卽日去三木而荷犁鋤者數百人無何坐註誤
左遷許州判官改真定通判大名同知尋復擢河南僉
事時鄭府橫恣不法紳悉緝治之遂歛跡晉福建布政
司叅議適倭奴猖獗而福寧尤急巡撫王詢特以紳往
勦之三戰三捷擒斬五百名級有奇倭大劔遁去地方
以寧捷聞有金綺之賜晉四川按察司副使四川松潘
故維州境外地也軍夷雜處叛服不常紳至動中機宜
形格勢禁一發卽就戮有奸軍周尚武者陰蓄異志紳
密偵之擒其首十八人如儿上肉餘黨悉平因條上五
策皆彊圉大計撫臣乃疏請行之而紳以西土寒甚不
堪堅請致政歸歸六年乃死紳敷歷中外逾三十年所
至功見言信威惠並行固濟世才也顧屢躋屢起竟徘徊
藩臬間而止士論惜之

禮部尚書閔師望如霖

閔如霖字師望烏程人嘉靖戊子舉於鄉壬辰登進士
第改庶吉士授翰林院編修歷官禮部右侍郎陞南京
禮部尚書致仕歸歸踰年而卒始終稱爲完節霖爲人
寬大溫博與人交不爲畛域然亦未嘗苟同於人歷官
清華不一踐繁劇而遇事能斷在廷諸老徃徃以疑事
質之應聲剖析無不中窾以故才名重一時三典文衡
校閱精審其所獎拔徃徃在文藝尺幅之外應天旣撤
棘有狂生某者詣霖自言霖令誦其文誦未畢霖抽所
落卷示之譏彈甚悉其人媿服而去掌國學主於嚴身
率物不爲苛細六館之士至今德之及教庶吉士嘗曰
朝廷任我重矣不及時與諸君商論國家大政使知輔
養所急顧令雕鏤文字相夸示爲工邪故是科最號得
人留者皆名士云

禮部尚書秦子豫鳴雷

秦鳴雷字子豫臨海人僉憲禮之子生未彌月失母甫
五歲而僉憲復不祿當是時伯父大叅文無子楊夫人
岐嶷雷遂子之弱冠補諸生而大叅死哀能成禮大叅
故清白家日益落雷食貧讀書益不懈癸卯薦於鄉甲

辰成進士。廷試閣臣擬進呈第七及。肅皇帝親閱卷。則首擢雷。次日以例謁分宜。分宜曰。吾不敢貪天工。君蓋天子門生也。因出。御劄示雷。始知平津有繼美云。授翰林院修撰。無何楊夫人卒。奔赴哀毀。一如所生。服闕仍前職。是時。皇帝方事玄修。分命史官撰玄。不次擢在位。多染指焉。雷序當首推。特先期請假去。聞者重之。壬子主考順天鄉試。以九載考。陞左春坊左諭德。進翰林院侍讀學士。克廷試讀卷官。轉南京國子監祭酒。進太常卿。仍理監事。陞禮部右侍郎。尋轉左。乙丑克會。

試知貢舉官。雷前後兩握文衡。二典成均。號稱多得士。進吏部左侍郎。以論罷。無何薦起南京禮部右侍郎。未行。卽家拜禮部尚書。適。穆廟登遐。典禮藜。奮臺省畿。

輔來就質者。旁午於道。雷稽古。援今舉。疵修墜。時論允。協故事。南京聞詔。後禮卿率百僚上疏慰安。一如北京例。雷言。南都聞詔。已匝月。疏入。則兩越月矣。安得比輦。轂下哭。臨時禮力主罷。識者題之。明年乞休歸。歸而優游家食。乘肩輿。游覽山水間。若齊雲雁宕石梁天姥。皆裘糧策杖。以窮其勝。時時命駕過武林。穿幽透深。於兩。

峯三竺間望之者以爲神仙中人也。未幾以微疾薨。年七十有六。雷天性孝友。以所生事所後。而又未嘗以所後後所生事。三兄篤友于之愛。嘗曰。孝弟豈必盡如卧冰泣竹灼艾同被哉。盡心焉耳。居鄉樂易。不爲城府。若無有科名爵秩者。子孫有過。微示顏色。如萬石君不苛責也。親友呈吏議。未嘗輕爲執事筆。及遇凶歲。則汲汲以賑濟。平糶蠲稅爲請。不獨出私廩以給待哺。作饘粥以起溝瘠而已。性喜讀書。博綜羣籍。工詩文。文宗兩漢詩宗晉唐。皆直抒性靈。不作鉤棘語。書法師心。而道勁自具。意態所著集若干卷。行於世。

廣東左叅政吳汝瑩珙

吳珙字汝瑩。錢塘人。舉嘉靖癸未進士。拜行人司行人。歷司副刑部員外郎。廣東按察司僉事。尋進副使。擢布政司左叅政。卒於官。始其父士寧三娶無子。年五十有七。周宜人始生珙。故珙最愛於父母。然於學問不督。而能弱冠爲諸生。名蔚然起。及官刑部時。嘗同考順天鄉試。其所爲文章。諸方家自謂弗及。故海內知珙能文。然珙固知兵習吏事。爲員外。摘姦抉隱如神明。大廷尉讀

其獄詞必曰吾固知非吳員外不能辨其所治囚卽罪死無號呼不平者爲僉事飭兵嶺南蒐士卒立保伍明法令察盜所出入根拔苗薈境以大寧連寇作督師征之殺降過當而清遠峽以險阻多盜發卒六百人鑿山三十里爲梁二十有一舟用得挽以濟爲副使籍民舟之賈於海者什伍爲綱紀約寇至共擊之私去爲盜者衆發之不發與連坐海寇頓息性踈爽喜調笑諧謔治園亭西湖之濱與賓客燕游其間若樂而忘檢者至持官奉親特嚴以孝縣吏嘗植柑分巡廨中間遺玳玳曰此官物吾不可以私盡易錢輸之庫周宜人病痢割股肉和藥以進痛父以食芋邁疾終其身不忍食芋宦游四方必奉像櫝懸之祭則展拜以泣比病不能言數引手上指像忽自墜其僕曰得非欲奉以行乎領之而逝年六十有三初玳玳之至嶺南也勤於其官按行郡邑觸冒毒瘴遂患癘比爲叅政會天子有事安南治益勤旣疾革猶日命吏抱文書置榻前卧閱之故以羸卒

禮部尚書兼翰林院學士汪振宗鏜

汪鏜字振宗鄞人年十四以戴記游於泮官鄞諸生故

善易。勘爲戴記者。鄞之有戴記。自鏗始。故鄞有汪氏。禮嘉靖甲午。領賢書。丁未。成進士。改翰林院庶吉士。授編修。命教內書堂。內書堂者。諸少閣所業也。鏗每爲談小雅。巷伯以下。保其專良之志。多信悅者。考滿。陞侍讀。管理文官誥勅。陞左春坊左諭德。出視南翰林篆。尋署南國子監事。留都士驕佚。鏗飭規勵行。六館之士。翬與甲子。召還。復管文官誥勅。陞國子監祭酒。頒五倫條約。禁止超驀。及清廩餼之乾沒者。以給諸生。廸行敦誨。文教一新。擢南京工部侍郎。莊皇帝御極。大典錄成。陞俸

一級。歷晉南京禮部右侍郎。尋召比爲禮部右侍郎。管國子監事。克經筵講官。癸酉。純皇帝初御經筵。陞左侍郎。兼翰林院侍讀學士。回部管事。隨克實錄副總裁。兩朝實錄成。陞禮部左侍郎。尋晉尚書。兼翰林院學士。如故。五疏乞休。給馳驛歸。鏗天性凝雅。斤斤矩矱。寡言笑。無町畦。可尋起詞科三十餘年。在嘉靖時。方沉濁。不可以莊語。而鏗優游奉璋橐筆之事。不爲感激悲歌之態。亦終無駢染隆萬來雅意。獻納一稟於仁義。上嘗虛已聽納。乞休之疏。歲有蓋。自謂器非適時。思抗域外。

之想耳。上篤念老成，端慎綢繆甚厚，雅志求退，分安止足，可不謂善始善終哉。卒年七十有七，守臣以聞，禮部上議，賜祭二壇，遣行人營葬事，贈太子少保，制曰：可。

福建左叅政馮明卿臯謨

馮臯謨，字明卿，海鹽人。嘉靖庚戌進士，授刑部雲南司主事，歷員外郎，恤刑江南，多所平反。秩滿陞江西按察司僉事，攝九江。時東夷寇吳越，川廣兵調過九江，橫甚。臯廉得首將名，令勒卒歸，伍士民迄安堵。既而攝湖西，分宜舍中兒多怙勢不法，臯悉縛置之獄。當是時，廣東

倭夷海寇與峒賊並發，而大盜張璉復崛起，張甚視諸藩最多事。會臯以久次當徙，分宜遂以舊銜喚陞廣東布政司叅議，專董湖潮兵事。當事者稔知臯才，卽詢制禦之策。臯曰：璉等若與倭寇合，則兵不易戢。今莫若先赦海寇，使得自效，與同力逐倭，倭遁然後會兵大征。一舉而璉等可擒也。當事以爲然，亟表臯行副使事。盡以兵事屬臯。於是海寇許朝光、林道乾、王伯宣等悉爲臯致命，而倭連挫。伯宣者，機智尤雄，時官兵與倭相持三河日久，臯密出手書招伯宣立功。伯宣素服臯威，信聞

命卽至。臯喜降階慰勞，立賜卮酒，授以旗牌，所將精兵千人，詭爲倭裝，夜駕輕艘，疾至三河，先佈鐵蒺藜，令死士數人從山後登踞高岡，發哨吹笳，倭衆倉惶驚竄，盡觸蒺藜，扶傷而戰，自辰至午，死者大半，遂解三河之圍。甲子四月，集水陸師十萬於廣州，分爲五哨，合和平詔安二哨爲七，臯以烏槎哨居中兼制之，尅期向饒平師度程鄉山，行七日夜，食且盡，軍中洶洶言食盡，將甘心督餉者，臯聞之，單騎迂道至一村，大呼曰：我馮副使也。天兵臨賊，旦暮且破，而乏食，若輩能相佐乎？村民稔臯德，爭捐私帑得米數百石，羊豕數百頭，師乃大安。五月丁亥，圍饒平，軍於大埔，諸將請攻璉，臯曰：不可。攻瑕則堅者瑕先襲，蕭雪峯擒之，璉窘乞撫，臯僞許之，而陰勒大兵迭進，遂擒璉，斬首千餘級，招安脅從數萬人，捷聞實授副使，賜以金幣，遷福建左叅政。時論平廣功，擬臯開府，而分宜銜臯不置，竟不果。未幾謝政歸，歸三十餘年，杜門著書，累薦不起。卒年七十五，所著有居閒集、白雀園漫稿，行於世。

右春坊右諭德屠文升應垓

子仲律叔芳孫謙蒙大壯附

屠應垓字文升康僖公第六子也少踈朗曠達不繩細行一出語輒驚其先輩初以父廕入太學既而見其兄應垓應坤皆列方面金紫耻獨以閎恩貴乃力學自苦嘉靖乙酉舉應天鄉試第二人明年第進士選翰林庶吉士垓自負雋倬意不可一世人而屬中秘清燕羅百氏言盡讀之其學日益闕大窮變爲文比事屬辭陳誼類情縱橫子史經傳而宗本子長詩法汎瀾百家意有獨至而陰搯其勝於衆人沿襲之外故自名公大家無不傾已下之同時有吳中袁永之四明陳約之錫山華子潛晉江王道思皆一時勝流垓與之友日相引上下其議論又館中諸吉士盡負才名與垓雁行列而垓實衙官命之方其居常賦詠人擅其長皆矜用以爲美及垓脫稿出羣萃而讀之則人人自失矣當是時張文忠初得君好變易典制諸吉士皆少年負氣不能屈徃徃抗視閣臣文忠怒盡黜諸吉士垓授刑部主事調禮部主事歷儀制郎中諸郊廟典禮多所裁定改翰林修撰同校列聖訓錄成賜宴謹身殿仍賜金幣進侍讀尋轉右春坊右諭德引疾乞休疏四三上始得請歸卽

疾作數年不能起先是交趾弗靖不臣貢者且二十年
 所詔廷臣議才望者使往諭廷臣議以竣應詔竣奮然
 曰人臣無橫草之功侍講幄得奉使命當宜天子威
 聲萬里外吾之願也而議乃寢不行然而竣志亦壯矣
 竣生平好為奇節豪宕風發飲酒百鐘不醉又好內後
 庭多稚齒媵媵之人稅文之暇則御之後居官十五六
 年大致如此或云欲令損真竣疾則宜也藉令不病則
 不自廢退即病能勉坊局則六七年間亦可遂躋台鼎
 卒以病廢病亦遂卒長筭屈於短日可勝惜哉所著有
 蘭暉堂集行於世子仲律廬州知府叔芳山東副使孫
 謙山東副使蒙甲子省試貢士大壯戊子順天鄉試貢
 士

廣東右叅政管道夫見

管見字道夫餘姚人嘉靖丙戌進士授常州府推官風
 檢嚴峻見理速而持事堅樞勢不可動搖蒞任未幾豪
 強斂迹諸當道有疑事累年不決者必以屬見見一鞠
 無遁情以治最召拜吏科給事中尋轉兵科左監壽
 陵大工時戶工二部建議加賦以佐工費見抗疏極陳

利害以爲不可。上是之。仍黜建議者。海內陰被其澤。未幾轉戶科都給事中。以疾乞歸。尋起補禮科。辛丑。正旦日食。上召輔臣暨大宗伯。偕禮科諸給事集便殿。議朝賀應否。衆猶豫不敢決。見議朝賀宜擇日行。明皇。上敬天之意。上嘉允之。明年擢廣東右叅政。廣地故多貨寶。見水蘂自持。矚然無毫髮之染。無何引疾歸。足跡不入城府。日以睦族善隣。明農教子爲事。臺使者屢疏薦起之。卧不應。葺草堂於峽山之間。以耕釣自老。卒之年七十有二。

廣東按察副使王育德叔果

祖鉦父澈附

王叔果字育德。其先世琅玕。及宋有惠者。徙永嘉。遂爲永嘉人。凡七傳而爲封公鉦。果之王父也。鉦二子。長澈。官福建左叅議。而仲子激。至國子祭酒。澈娶潘恭人。年四十餘。未舉子。得異夢。始舉果。果生而英異。七歲。語十三。補博士弟子。未幾薦鄉書高等。嘉靖庚戌。成進士。授兵部職方司主事。以使事歸省。而倭寇海上。族從所謂給事德者。從義兵與角。不勝。死之。族烏獸竄。果與弟杲謀曰。不早爲備。胥將無族矣。亟還朝。上書願以家。

崇爲城堡以捍賊而完其族報可時杲猶在公車不復
詣請與果捐橐而躬畚耜之後堡成賊有環睨而已至
今賴之歷員外郎郎中出閱視薊鎮兵請罷昌平帥歲
省以萬計改武選郎中武選最爲猥雜號吏藪果至當
注選與諸僚精覈而次第之吏不得有所負宿弊若洗
滌六載以不謁分宜僅遷湖廣布政司右參議治荆西
荆西爲承天德安二郡承天世廟故邸也有先皇
之陵在而德安爲景恭王初封國而地中貴戚晚爭挾
重魚肉赤子爲業果一切引之以禮不聽則裁之以法

竟果任相戒無敢犯者會分宜敗吏部以果舊資重甫
一歲餘擢廣東按察司副使時廣數中倭大司馬以果
孱恐不能勝軍旅而重其文疏請以內地學政處之吏
部知其指覈果歸里聽用果喜曰司馬知我唯太宰亦
知我遂杜門不復出家世素封而雅不問產聽子弟息
之了不知也日食不能時二簋實以蔬筍間一阻膾魚
乾脯衣僅布素或三澣破則縫之姬姜粉黛一不以入
目過亦如無日生不曉名儉寧論奢性一切無所嗜顧
獨嗜書無一日不開卷於子史百家下及稗官黃衣之

說靡所不涉。而其所專精者。則六經性理之學。所著有永嘉縣志十卷。半山藏稿二十卷。

湖廣布政司右參議蔣汝才勸能

蔣勸能字汝才。餘姚人。臨江太守坎之子。年少善屬文。補邑弟子員。以貲入太學。登嘉靖乙丑進士第。授行人。擢禮部祠祭司主事。是時署中多知名士。共訂讀書約。欲兼通今古。先讀經濟錄。吾學編次。乃讀左氏傳。龍門班范諸史。各以意加評點。十日爲期。公退時。集署中名。携所讀帙來。直會者一人。朗誦。遇有疑。則共相辯論。勸

能沉細。不爲枝蔓。談衆方競辯時。勸能默聽之。間出一語。輒中的。尋擢精膳郎出。爲湖廣布政司右參議。分轄衡永其治。以慈惠爲本。不屑屑求名。而仁澤及民者甚多。零陵有要人。氣焰甚張。宦楚者多屈意奉之。屢以事干。不爲意。遂誣搆之。中白簡。鑄一級歸。又明年。楚直指復加重劾。直指臨江人也。屬父坎舊治。或有宿嫌。未可知。而勸能遂不復言仕矣。永州龍興寺有息壤。柳子厚嘗記之。謂隆然負磚甍而起者。步四步。高尺五寸。始爲堂也。夷之。而又亭。凡持錘者。盡死。由是人莫敢夷。子厚

曰南方多疫勞者先死彼時鍾者其死於勞且役耳土
烏能神論者以爲然勸能存永時彼要人欲攘此寺爲
宅郡邑皆唯唯勸能獨持之不與及歸而地竟屬彼土
功與執鍾者八人一日死未幾彼要人亦卒宦永者遺
勸能書曰使公早與之則向時彼已死無能害公矣聞
之者無不驚恠以爲奇按息壤有二一甘茂盟處一卽
此所云鯨竊以堙洪水者未知孰是觸者死前後皆符
然則理誠不可曉子厚以勞疾當之者亦臆說也勸能
家居好讀書所著有姚邑賦詩文集若干卒年六十八

卷之四